

## *ASO LUA, 5 MATI 2024*

*Na tauaofia le Fonotaga a le Palemene i le itula e 9.31 i le taeao e tusa ai ma Polokalame o Fonotaga a le Palemene 2024/2025.*

Tatalo.

**FOFOGA FETALAI:** Ou te faasilasila atu ua amatalia nei Taualumaga a le Fono Aoao Faitulafono.

O le a asamua ia se leo o le Fofoga Fetalai se i vaeatu le paia o le tatou Maota, o lea ua folau le lautifa ae pipii le afu i le vaa, ua to'a foi le ulu ina ua pale i le aliti tautiga o le matāvaga. O paia o le alafā i Tiafau nei o paia lava e tumau e oo i le faavavau, o sa ma faigā e afua mai Saua seia paia le tai ulaula o Nafanua aua Aiga ma a latou Tama, o Tama foi ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Le tapuaiga a Lana Afioga Mamalu i Le Ao o le Malo ma Lana Masiofo, le Sui o le Fono a Sui Tofia ma lona Faletua, le Famasino Sili faapea le Peresetene o le Faamasinoga o Fanua ma Suafa ma le mamalu o le itutino o le Faamasinoga. Faauluuluga o Ekalesia Kerisiano uma i Samoa ma le aufaigaluega totofi o le Talalelei.

E faapea foi nai o tatou uso i Sasae, i le afio o le Kovana Sili ma le Lutena Kovana, le afio o le Peresetene ma le Maota Maualuga, afio foi le Fofoga Fetalai ma sui mamalu uma o le Maota o Sui. O paia aua Malaetele e afio ai le Laau Amotasi, Faatuiolemotu ma Auvaa o Tootoo, ma le mamalu i le Manuatele. Afio Sua ma le Vaifanua, Fofu ma Aitulagi, Ituau ma Saole, le Launiu Saelua ma le nofo a Maopu ma upu i le Falesefulu. Nuunuu atu ia i le fatuaiga tausi a tulatoa o Samoa, o le latou faiva taufai lea.

Ae i le afio o lau Afioga i le Tamaitai Palemia, afio lau Afioga i le Sui Palemia ma afioga i Minisita o le Kapeneta, e faapea foi a outou Afioga i Minisita Lagolago.

Afio lau Afioga i le Taitai o le Itu Agai faapea le Sui Taitai ma sui usufono mamalu uma o le Palemene. Ou te faatalofa atu ai i lenei taeao, malo afua ailao ua maua, e le faaititia le viiga o le Atua ina ua maleifua mai i faguga lelei le paia o le Palemene, ae talitonu foi o lo o faapena le atunuu atoa. Malo le soifua manuia ma le lagi e mama.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti o le tatou Malo, taeao manuia, malo le usu. Le alofaiva o le tatou Maota i lenei taeao, ia agalelei le Atua. Manuia le usugafono lau Afioga i le Tamaitai Palemia ma lau Kapeneta, manuia le usugafono a sui usufono mamalu uma o le Palemene, manuia foi le tapuai mai o le atunuu.

## **FAAALIGA MAI LE TAITAI O LE MAOTA**

E tusa ai ma Tulafono Tumau 76 a le Palemene, ua tuuina atu nei le Faaaliga i le Fono Aoao Faitulafono mo le iloiloina o le Tulafono Tau Faaofi ua faalia iinei:

1. Tulafono Tau Faaofi o Teuteuga o le Tulafono o Faiga Palota 2024.

**Tuuina** atu i lenei **aso 4 o Mati** i le Tausaga 2024.

**Sainia: Hon Fiamē Naomi Mataafa**  
**TAITAI O LE MAOTA.**

## **TUSI FAAMAONIA O LE TULAGA FAANATINATI**

E tusa ai ma le Tulafono Tumau 100(2) ua tuuina atu nei le faaaliga i le Fono Aoao Faitulafono mo le iloiloina o le Tulafono Tau Faaofi ua taua i lalo i lona Tulaga Faanatinati:

1. Tulafono Tau Faaofi o Teuteuga o le Tulafono o Faiga Palota 2024.

**Tuuina** atu i lenei **aso 4 o Mati** i le Tausaga 2024.

**Sainia: Hon Fiamē Naomi Mataafa**  
**TAITAI O LE MAOTA.**

## **TUUIA ATU O PEPA**

*Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).*

1. P.P.2023/2024 Nu.115, Lipoti Faaletausaga a le Matagaluega o Galuega Tau Alamanuia ma Atinae a le Malo mo le tausaga faaletupe 2022/2023.
2. P.P.2023/2024 Nu.116, Lipoti Faaletausaga a le Faletupe Tutotonu o Samoa mo le tausaga faaletupe 2022/2023.

3. P.P.2023/2024 Nu.117, Tali a le Malo i le P.P.2022/2023 Nu.150, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.129, Lipoti Faaletausaga a le Komisi o le Toefuataiga o Tulafono a Samoa mo le tausaga faaletupe 2021/2022.
4. P.P.2023/2024 Nu.118, Tali a le Malo i le P.P.2022/2023 Nu.111, Lipoti a le Komiti o le Vaega Tau le Tamaoaiga i le P.P.2020/2021 Nu.79 & P.P.2021/2022 Nu.28, Lipoti Faaletausaga a le Faalapotopotoga o Eleele o Samoa mo tausaga faaletupe 2019/2020 & 2020/2021.
5. P.P.2023/2024 Nu.119, Tali a le Malo i le P.P.2023/2024 Nu.86, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.12, Lipoti Faaletausaga a le Komisi o Galuega a le Malo mo le tausaga faaletupe 2021/2022.
6. P.P.2023/2024 Nu.120, Lipoti Faaletausaga a le Matagaluega o Pisinisi, Alamanuia ma Leipa mo le tausaga faaletupe 2022/2023.
7. P.P.2023/2024 Nu.121, Lipoti Faaletausaga a le Ofisa o le Failautusi o le Fono Aoao Faitulafono mo le tausaga faaletupe 2022/2023.
8. P.P.2023/2024 Nu.122, Lipoti Faaletausaga a le Matagaluega o Fesootaiga ma Faamatalaga Tekonolosi mo le tausaga faaletupe 2021/2022.

Ma le faaloalo lau Afioga.

### **TUUINA ATU O LIPOTI A KOMITI FAA-PALEMENE**

*Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).*

1. P.P.2023/2024 Nu.123, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.39, Lipoti Faaletausaga a le Ofisa o le Loia Sili mo le tausaga faaletupe 2021/2022.
2. P.P.2023/2024 Nu.124, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.40 & P.P.2023/2024 Nu.101, Lipoti Faaletausaga a le Ofisa o le Komisi o Faiga Palota mo tausaga faaletupe 2021/2022 & 2022/2023.
3. P.P.2023/2024 Nu.125, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.42, Lipoti o le Faiga Palota Laitiiti mo le Itumalo Palota - Vaimauga 3, 2023.
4. P.P.2023/2024 Nu.126, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.48 & P.P.2023/2024 Nu.105, Lipoti Faaletausaga a le Ofisa o Tausi Mavaega mo tausaga faaletupe 2021/2022 & 2022/2023.
5. P.P.2023/2024 Nu.127, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024

- Nu.71, Lipoti Faaletausaga a le Penisione a le Palemene mo le tausaga faaletupe 2022/2023.
6. P.P.2023/2024 Nu.128, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.79 & P.P.2023/2024 Nu.80, Lipoti Faaletausaga a le Ofisa o le Failautusi o le Fono Aoao Faitulafono mo tausaga faaletupe 2020/2021 & 2021/2022.
  7. P.P.2023/2024 Nu.129, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.83, Fuafuaga Autasi a le Ofisa o le Failautusi o le Fono Aoao Faitulafono mo le Vaitaimi 2022-2026.
  8. P.P.2023/2024 Nu.130, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.102, Lipoti Faaletausaga a le Ofisa o le Komisi o le Toefuataiga o Tulafono a Samoa mo le tausaga faaletupe 2022/2023.
  9. P.P.2023/2024 Nu.131, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P.2023/2024 Nu.106, Lipoti mo Faiga Palota Laiti mo Itumalo Palota - Faleata 4, Siumu ma Vaa o Fonoti 2023.
  10. P.P.2023/2024 Nu.132, Lipoti a le Komiti o le Vaega o Atinae Eseeese i le P.P.2023/2024 Nu.141, Lipoti Faaletausaga a le Matagaluega o Fesootaiga ma Faamatalaga Tekonolosi mo le Tausaga Faaletupe 2021/2022.
  11. P.P.2023/2024 Nu.133, Lipoti a le Komiti o le Vaega o Atinae Eseeese i le P.P.2023/2024 Nu.107, Lipoti Faaletausaga a le Auaunaga o Vaa a Samoa mo le tausaga faaletupe 2022/2023.

Ma le faaaloalo lau Afioga.

## **TULAFONO TAU FAAOFI O TEUTEUGA O LE TULAFONO O FAIGA PALOTA 2024 – faitauga muamua**

**FOFOGA FETALAI:** Ou te tapa lau Afioga i le Minisita o le Komisi o Faiga Palota.

**Afioga Hon FAUALO HARRY JEFFREY SCHUSTER (Minisita mo le Komisi o Faiga Palota):** Faafetai tele lau Afioga i le Fofoga Fetalai mo lou avanoa.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota 2024 i lona faitauga muamua.*

*Faaluaina e le Minisita mo Faatoaga ma Faiga Faiva ma le Minisita mo le Soifua Maloloina.*

*Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota 2024 i lona faitauga muamua.*

**TULAFONO TAU FAAOFI O TEUTEUGA O LE TULAFONO O  
FAIGA PALOTA 2024 – faitauga faalua**

**FOFOGA FETALAI:** Talu ai ua ou taulimaina le Tusi Faamaonia o le Tulaga Faanatinati ua maea ona sainia e le Taitai o le Maota leni Tulafono Tau Faaofi, o lea o le a sagai atu loa le Fono Aoao mo le faitauga faalua ma faagasolo ai lava seia faitauina faatolu.

Ou te tapa lau Afioga i le Minisita mo le Komisi o Faiga Palota.

**Afioga Hon FAUALO HARRY JEFFREY SCHUSTER:** Lau Afioga i le Fofoga Fetalai ou te faatu le Lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota 2024 i lona faitauga faalua ma ou te fia tautala faamalamalama i ai.*

*Faaluaina e le Afioga i le Minisita mo Faatoaga ma Faiga Faiva ma le Minisita mo le Soifua Maloloina.*

**FOFOGA FETALAI:** Tulai mai lau Afioga i le Minisita mo le Komisi o Faiga Palota mo lau saunoaga faamalamalama.

**Afioga Hon FAUALO HARRY JEFFREY SCHUSTER:** Faafetai lau Afioga i le Fofoga Fetalai mo le avanoa. Ou te tulai atu e fai se faamatalaga mo le Tulafono Tau Faaofi, o le Teuteuga o le Tulafono o Faiga Palota 2023 mo se Tulafono a Samoa.

Ua talosagaina e le Tulafono Tau Faaofi le Teuteuina o le Tulafono o Faiga Palota 2019, Tulafono Autu.

O le Sini Autu o le Tulafono Tau Faaofi ia ausia ai sini a le Ofisa o le Komisi o Faiga Palota i le faamauina o igoa o tagata palota ma le tausiga o lisi faasologa o igoa mo Faiga Palota tapenapena ai mo le Faiga Palota tele i le 2026.

O leni Tulafono Tau Faaofi e tuuina mai i se aiaiga i le Ofisa o le Komisi o Faiga Palota, ina ia faatautaia le toe faamauina o igoa o tagata palota mo Itumalo Palota i palota uma ina ia faaitiitia faafitauli alia'e mai i le lisi o le faasologa o igoa mo tagata palota ua maliliu, nofomau i atunuu mamao ma i latou e le i toe tuulata mai o latou faamaumauga.

Fuaiupu muamua lau Afioga i le Fofoga Fetalai ua aiaia ai mo le Igoa Puupuu ma le aso e amata faamamaluina ai le Tulafono Tau Faaofi.

Fuaiupu lona lua, e teuteuina ai le Vaega 13 o le Tulafono Autu e aiaia ai vaega nei; le aveeseina o upu pe afai o lena tagata o lo o i Samoa pe a uma le upu "ao". O le teuteuga lua, e suitulaga i le Fuaiupu 2 ma le Fuaiupu 3 ia atagia ai le suiga fou ma le faaleleia o le faiga faamauina o igoa i luga o le fesootaiga tau initaneti, lea e mafai ai e se tagata palota ona fatumu sao a latou faamatalaga i luga o le initaneti. O le tulaga foi lea e aiaia ai faapea o se tagata na talosaga

mai e faamauina lona igoa i fesootaiga tau initaneti. O le a tusia lona igoa i luga o lisi o faasologa o igoa o tagata palota seiavagana ua maea le faasologa o le faamauina o igoa i lalo o le Tulafono Autu a o le i tapunia le lisi o le faasologa o igoa e pei ona i ai i le Tulafono Autu.

O le tolu, o le soloia o le Fuaiupu 8 ona o le faiga fou o le faamauina o igoa i luga o fesootaiga tau initaneti a le Ofisa o le a le faatapulaaina i le tagata ona o lo o faamalamalamaina nei taimi i lalo o le Fuaiupu 8. Na mafua ona o le a tatala i so o se tagata le faiga fou a le Ofisa mo le faamauina o igoa i luga o fesootaiga tau initaneti. Pe aumau iinei po o fafo atu o Samoa o le a mafai ona faamauina igoa i luga o le fesootaiga tau initaneti.

Fuaiupu 3, teuteuina o le Vaega 23 o le Tulafono Autu ina ia i ai mea nei; Muamua, suia le fuaiupu muamua e faamanino ai le matafai oi a le Komesina i le Tuufaatasia ma le Tausiaina o le Lisi Autu o le faasologa o Igoa mo Itumalo Faapalota Taitasi. Toe faamauina o igoa ma tagata palota ua o atu i isi Itumalo po ua maliliu. O lea foi e aiaia ai le toe faamauina o Igoa Resitalaina o tagata palota uma ina ia faatumauiina se Lola atoatoa ma sao atoatoa i le mea e mafai ai.

Lua, faaofi le faafuaiupu fou 1A ia tuuina ai le malosiaga i le Komesina o Faiga Palota ina ia faatagaina ai le toe faamauina atoa o tagata palota i le tai sefulu tausaga i le maea ai o Faiga Palota Aoao aua le tausiga o le Lola Autu.

Fuaiupu 4, tuuina mo aiaiga tausoloaiga ma aiaiga faasaoina.

Lau Afioga i le Fofoga Fetalai ou te tu atu ma le fiafia e faatalosagaina le Maota mo suiga nei o le Tulafono. O le suiga lau Afioga e laitiiti a suiga na o le Vaega 13 o le Tulafono ma le Vaega 23.

I le Vaega 13 lau Afioga lea e i ai le resitalaina o le tagata palota, e faatino ai lana aiatatau e fai ai lana filifiliga. Ou te fiafia i le suiga lea lau Afioga, o le suiga e faatutusa uma ai tagata i lalo o le Tulafono ona o le Tulafono sa i ai muamua e pei ona faataatia i le Tulafono 2019, na o tagata la e aumau i fafo, na o tatou tamaiti aoga e aooga i fafo ma tagata Samoa o aufaigaluega a le Malo ma Faalapotopotoga a le Malo i fafo e mafai ona resitala mai i le initaneti. A o tagata palota iinei i Samoa e le mafai ona faaaoaga le initaneti, e te alu i le Ofisa Palota pe omai le Ofisa Palota i le taimi o le resitala ona faatino ai lea. A o le Tulafono lea ua i ai nei lea ua faatutusa uma lava tatou uma, sitiseni o Samoa ua agavaa e palota. E mafai, o lea e te nofo i Samoa ona e talosaga i le initaneti faapea foi pe a faapea o oe o le tagata Samoa ua agavaa e resitala mai fafo e mafai foi ona e talosaga mai.

E te talosaga mai e resitala oe, ae tumau lava aiaiga o lo o i ai i le Komesina o Faiga Palota ma le Ofisa e te toe sau mulimuli e faamaumau isi aiaiga lea i totonu o le Tulafono lea e i ai nei i le 2019.

E pei lava ona ou fai atu lau Afioga o le faatutusa o tagata uma i lalo o le Tulafono o Palota i suiga nei, o se suiga talafeagai ma lelei.

O le isi tulaga lau Afioga e fia faapupula i le Maota, i le faatinoina o le galuega lea e aumai ai le suiga lea a le Ofisa o le Komesina o Faiga Palota e leai ma se tagata Samoa e agavaa e palota e aafia sana aiatatau e palota ai pe aveesea ma le Lola. E faatino uma le galuega lea i le Tulafono lea e i ai i le taimi lenei, le Tulafono o Faiga Palota 2019. E le o suia, e le o avatu i suiga lea ou te talosaga

atu ai se suiga e aafia ai se agavaa o se tagata palota e mafai ona resitala. E tumau lava le agavaa o tagata uma o lo o i ai i totonu o le Lola la e mafai ona palota i totonu o Samoa i le taimi lenei. O se tulaga lea e tatau ona faamanino lau Afioga.

O le isi tulaga taua lau Afioga, i lalo o le Tulafono o Palota o le tiute o le Komesina o Faiga Palota e tatau ona ia faamaumauina ni faamaumauga i tagata palota e atoatoa toe sao ma faamaoni faamaumauga. E le gata la o le faamaumau i le tusitusi mo Lola Tusitusi ae faamaumau foi la i ala faatekonolosi o lo o i ai nei e faaoga ai masini foi ia, system e tuu i ai totonu ia faamaumauga, tuu ai ma tulaga foi lea o ata o tagata ma faailoga o tamatamailima. Ma o le tiute lea o le Komesina o Faiga Palota o la e i ai lava i le Tulafono lea o le 2019 e le o suia foi la. E le o suia i le suiga lea e talosaga atu ai le tulaga lea.

O le tulaga autu ou te fia faamanino lau Afioga, o le a le mafuaaga pito i taua lava e afua ai ona aumai le Tulafono Tau Faaofi lea i totonu o le Maota? O le tulaga pito i taua ua aumai ai lau Afioga o faamaumauga ia i le tiute o le Komesina e faaoga masini faatekonolosi e faamau ai faamaumauga. O le system na aumai e le Matagaluega ua ova i le 20 tausaga ua le toe gafatia e le auala faaneionapo lena ona toe faaogaina e resitala ai tagata ma faaoga e fai ai se Faiga Palota i le alu i le lumanai. Ua le mafai ona toe faaoga. O lea la ua oo i le tulaga ua aumai nei le system fou e faatino ai le tulaga lea ae ua le mafai ona faaoga e faaofi faamaumauga nei e i totonu o masini tuai nei i le masini fou. E le mafai ona fesootai mo ala faatekonolosi o nei onapo.

O la e i ai faamaumauga e mafai ona faaoga, a o le tulaga e pei ona i ai nei i le Tulafono ia i ai lou ata, iai ma faailoga o ou tamatamailima uma e sefulu. E le mafai ona aumai tulaga na mai masini o lo o i ai nei e tuu i totonu o masini fou lea ua faatino ai le Faiga Palota. O le tasi lena tulaga taua e taua ai le aumai o faatino o le suiga lea o le Tulafono. Ae na o le pau foi lea o le auala e mafai ona faaoga ai e le Komesina o Faiga Palota le suiga lea e fai mai nei po o le aumai o le Tulafono e ao ona toe omai tagata palota e toe pue le ata ma faapipii tamatamailima ia mafai ai ona faaoga ma isi faamaumauga lea i totonu o le system tuai, e ave i totonu o le system fou e faaoga e faaauau ai le Faiga Palota e alu i le lumanai. A leai la le tulaga lena ua le mafai i lalo o le Tulafono e le Komesina o Faiga Palota ona faatino le tiute lea e fai mai le Tulafono, o le mea lea a oe e fai, ia fai se mea ia atoa ma sao faamaumauga, atoatoa faamaumauga i totonu o le faiga faatekonolosi o lo o taatia uma ai agavaa ma tagata sitiseni Samoa e mafai ona Palota.

O le tulaga la lea o lea e faaofiina ai le Tulafono lau Afioga ina ia mafai e le Komesina o Faiga Palota ona faatino lona tiute lea. Ia i ai se Lola Electronic e iai uma ma atoatoa faamaumauga, o tala i le faamaumauga i le suafa o le tagata palota, o le mea e aumau ai, o le Itumalo Faapalota e palota ai ma lona ata ma faailoga o tamatamailima e 10.

O puipuiga ia lau afioga e le mafai ai e se isi tagata ona palota i le igoa po o le palota a le isi tagata ona o se vaega taua lea o le pule, o le pule lea e i le tagata palota e tatau ona malupuipua ona faamaumauga e mafai ai ona faatino lana pule i le faiga o filifiliga i aso e fai ai filifiliga mo Taitai o le Malo lau Afioga.

O le isi tulaga lau Afioga e fia faapupula atu, o lea ua aliae mai le tulaga lea e matua manaomia le fai o le galuega lea i le system fou ia atoatoa ai le resitala. E utiuti foi le taimi lea e totoe e agai atu i le isi Faiga Palota. A o le taimi nei i le faataatia mai o le Tulafono lea, o lo o mafai e le Matagaluega ona faatino le tiute lea ma oo atu i le taimi e fai ai le Faiga Palota o lo o talafeagai, sao ma atoatoa faamaumauga o tagata e mafai ona palota i le Palota a Samoa e sue ai filifiliga a le tatou atunuu.

Lau Afioga o se Tulafono pit oi sili ona taua, e taua mo tatou uma, e taua mo tatou uma lea e i totonu o le Maota lenei ona o le auala lea na ala ai ona tatou omai i totonu o le Palota. E taua le Tulafono ona o le puipuiga o le faamaumauga mo le tagata lea e faia le filifiliga i lana pule ma o tulaga ia lau Afioga e faatagisia ai le Maota mo le lagolago e pasia ai le Tulafono ia faaauau galuega a le Matagaluega ma le Komesina. Ma le faaaloalo lava lau Afioga.

**FOFOGA FETALAI:** Malo faafetai i lau Afioga i le Minisita.

Se i tulai mai lau Afioga i le Tamaitai Palemia.

**Afioga Hon FIAME NAOMI MATAAFA (Palemia):** Faafetai tele i lau Afioga i le Fofoga Fetalai mo le avanoa. E tulai atu foi ma le faaaloalo i le Maota Fono o le atunuu i lenei taeao, e ofo alofa atu, malo le lagi e mama ma le soifua manuia, ua molimoli mai lo outou soifua i lenei taeao ua atofaina mo galuega a le tatou Fono Faitulafono.

Lau Afioga i le Fofoga Fetalai ou te fia faaopoopo i le faamatalaga faamalamalama a le Afioga i le alii Minisita i le tatou Tulafono Tau Faaofi i lenei taeao. Aemaise i le itu ua maea le tatou faasoa Faapalemene i le aso ananafi ma sa faapea ona faamauina ai finagalo faaalua foi o Afioga i Sui usufono i le Tulafono lenei.

Muamua lau Afioga i le Fofoga Fetalai, i le tulaga aoatetele ma le vaaiga a le Kapeneta, o le mataupu autu lava ia o le faava'a po o le system o lo o faamauina ai le Lisi o Tagata Palota. O le mau ua aumai e le Susuga i le Komesina ma le afaigaluega ua le toe lelei le faava'a lea o lo o faagasolo ai le lisi o Faiga Palota i le taimi lenei. E pei o le autu lena o le liuliuina o le finagalo o le Kapeneta aemaise foi le mau i finagalo faaalua ma atugaluga o sui usufono o le Maota i le Tulafono lenei.

I le matau atu, e le i ai se agaga e teena le faatulaga o le system. A o le atugaluga e pei sa laualuga i le faalogo atu i le tatou faasoa ananafi, o le tele o le aafiaga o le vasega o sui usufono i le itu lava lea o le faamaopoopo atu o tagata palota, e lau tagata palota e resitala. E i ai a tatou tagata mai fafo, o le a i ai le aafiaga i le tulaga e moomia lava le omai i le faiga fou lea ua fofola atu ina ia maua ata o foliga ma le faamaumauina o tatou lima.

Lau Afioga i le Fofoga Fetalai, ia ina te i ua faapea mai le Maota e le o lagona e le Kapeneta atugaluga nei. A o le itu lea e tatalo atu ai pea i le tatou Maota o le tatou lisi o palota o le faavae lea e faagasolo ai faiga palota. Ae ua aumai le mau ua le atoatoa le faava'a lea e faagasolo ai le taimi lenei, o le popolega o le malo ina ia alu alu le tatou faamoemoe ae i ai ni pefea i le faatinoga o le tatou



palota lea e loma ona o le faaletonu o le tatou lisi. O le autu lava lena o le Tulafono ia ma isi itu lea ua faamanino e le Afioga i le Minisita. O le faapea mai foi e toe tolo, lau Afioga i le Fofoga Fetalai ma le mamalu o le Palemene, e le mafai ona toe tolo. Ona a faapea o le faamoemoe e tatou o i le faava'a tuai a e tatou o atu e faaletonu ona le manuia lea o le faamoemoe o le tatou faiga palota.

O le tulaga o le faanatinati lau Afioga i le Fofoga Fetalai, ona o le autu lea ma le meafaigaluega o lo o moomia ai e le Komesina ona avatu le faatagaga faaletulafono e faatino ai le suiga lea semeamanu o lava le taimi. O lo o lava foi le taimi o a nisi itu o le system e ao ona toe faaleleia ma amanaia ai nisi o aafiaga ia sa outou saunoa mai ai ananafi. E i ai le taimi e mafai ai foi ona tatou toe teuteu pe a faapea ua talafeagai. Ae o le uiga lena e pei ona tatalo atu le Afioga i le Minisita ia avatu le faatagaga faaletulafono e amata ai loa ona galue le Komisi ma le Matagaluega i le faamaopopoina o le tatou lisi. Ioe, e tele aafiaga o tatou, ou te le tau faamalamalama atu. A o le mea e tatau ona fai.

Sa fai lau tala faatusa i le matou faasoia foi vaeane le Maota e pei o se taavale. O le taavale o le meafaigaluega ae ua tuai e alu alu pe... e alu alu nofo ua le toe aoga. O le mea lena ua oo i ai le faavaa o le faagasologa o le faamauina o le tatou lisi palota. Tatou te le manaomia se system e alu alu faaletonu a o lea tatou te tapena mo le faiga palota o lo o sosoo nei. O le avanoa lea e faailoa ai le finagalo ole atunuu i sui usufono e tulai mai e faafoea le Malo i lea taimi ma lea taimi. Ma o le tiute o le Komesina o Faiga Palota ia faamautinoa le faagasologa o le galuega i se tulaga pito sili ona lelei ma tulaga tutusa ai tagata uma. E fai o tagata palota ae fai silasila foi i le vasega o i latou e avea ma sui tauva. Ia, lau Afioga e... atonu ua lava foi le tatou faasoia ananafi. Ae ua ou toe tulai atu e toe momoli atu lava le tulaga lea e tatai i ai le silasila a le Maota i le faagasologa o le tatou Tulafono lena ua tatau ona sui le system e faamaumau ai le lisi o tatou tagata palota. Ma le faaaloalo lava.

**FOFOGA FETALAI:** Faamalo malele malo foi le saunoa i lau Afioga le Tamaitai Palemia. Ua saunoa foi le Afioga i le Minisita i le taimi ua sola ma faamalamalama atili le uiga o le Tulafono ma le faamoemoe o le Tulafono. Malo faafetai i lau Afioga i le Minisita mo le folasaga. Atonu o le mea foi lea sa finagalo i ai sui usufono mamalu ananafi ina ia faamalamalama atili le faamoemoe ma le taunuuga o le Tulafono Tau Faaofi. Lea foi ua faaopoopo le Afioga i le Tamaitai Palemia leaga o lea sa saunoa i le aso ananafi ia o le a toe silasila i ai le Kapeneta. Ia o lea lava sa faatino mea uma, lea foi ua saunoa manino le Afioga i le Palemia e le o mama i le Kapeneta ma le Malo le Tulafono e pei ona faailoa ma tuuina mai i totonu le Maota.

O le mea lea, sui usufono mamalu, o lea ua folasia le finagalo o le Minisita ia lea foi ua saunoa manino le Taitai o le Malo, o le tulaga lena o le faamoemoe mo le tatou Tulafono Tau Faaofi. Ia ou te talitonu foi o lea ua avanoa le tatou Maota mo se sui usufono e fia saunoa.

Ia, o lea ua maitau atu ua fou mai le Sui Taitai. Ia tulai maia lau Afioga i le Sui Taitai o le Itu Agai.

**Tofa Hon LAUOFO FONOTOE NUAFESILI PIERRE LAUOFO (Anoamaa 2):** E momoli atu le faafetai i lau Afioga i le Fofoga Fetalai mo le avanoa i lenei taeao fou. Ae manatu o lea ua tea i lagi le tatou taulaga sa osia e lau Afioga. Ia ua tatou i ai faatasi uma i lena. Viia le Atua i lenei taeao fou ua toe tauaofia le tatou Maota aua le faagasologa o galuega masani ai aua le atinaena o le tatou atunuu.

Faamalo foi i le tapuaiga a le atunuu o le faafogafoga mai i Samoa nei ma atunuu e mamao. O le paia i Tama ma Aiga, Aiga ma latou Tama, Usoga a Tumua ma Pule, Aiga i le Tai ma le Vaa o Fonoti. Faamalo le tapuai. Faamalo foi i le itupa o aufaigaluega tofofi a le Atua mo talosaga, nonomanu aua se manuia o le tatou atunuu. Ia maua pea le nofo lelei ma le nofo fealofani faapea foi le faatinoga o tatou atinae aua se manuia au i luma o Samoa faapea tupulaga fai mai. Ia lou itumalo, faamalo foi le tapuai. O paia ma mamalu, sa ma faiga o le tatou itumalo e tumau e le avea. Ia faamalo le tatalo.

Lau Afioga i le Fofoga Fetalai, e faamauina lau faafetai i le Afioga i le Minisita e tusa ai ma le Tulafono Tau Faaofi ua faataoto i le Laulau a Fono i lenei taeao i se tulaga faanatinati aua le tapenaina o le tatou lola mo le faiga palota, ia po o nisi foi faiga palota o lumanai. O lea ua matauina ua faatulai mai le faaaogaina o tatou tekonoosi mo le resitalaina o le au palota e faaoga ai le computer foi lea e taua mo le online registration e aofia ai tagata palota i totonu o le tatou atunuu o lo o afifio ma papaaao i le atunuu a o lo o agavaa foi ma i latou o lo o papaaao i atunuu mamao ona faaoga le online e faailoa mai ai lo latou naunau e faatino a latou palota i faiga filifiliga a le atunuu aua tofi ma sui usufono mamalu o le tatou Maota nei. O le tekonoosi faaneionapo e lelei... e lelei pe a sao ona faaoga ma lelei ona faaoga. E le tetee foi lou sui usufono i le tulaga o le taua ma le aoga o tekonoosi faaneionapo ae faaoga i le tulaga tatau ma le tulaga lelei e maua ai manuia e faafaigofie ai le faatinoga o galuega ma tulaga faapena. A o lo o tatou maitauina foi ma tatou iloa o nei foi tekonoosi o lo o i ai foi luitau, o luitau e le faapea e atoatoa ona lelei. O lea ua maitau i le saunoaga faamalamalama a le Afioga i le Minisita, faafetai. Ae pei o lau tilotilo o tulaga tau luitau e feagai ma le online. O le online lea ou te talanoa i ai. O le faamoemoe o le Matagaluega ma le faigamalo ma tatou uma ia lelei le tulaga o le tapenaina o lola palota. O lona uiga o tagata ia e palota, ia lelei le tapenaina ia sao ma mautinoa o la e lelei ma atoatoa. O lona uiga i le tulaga foi lea ole faamoemoe lea ou te maua i le saunoaga a le Minisita ina ia aveese ai pe... faaaogaina le upu lea o le faamama... faaoga e isi le upu lea faapea o le kilini a? Ina ia aveese ai suafa o latou ua maliliu, o latou ua malaga atu i atunuu mamao e le toe foi mai, ia, ma toe faafou ai le tulaga o ata aua e pei ona silafia o lea ua faaoga ata e pueina ata ma tulaga foi ia o tamatamailima po o fingerprints. O se tulaga lelei ma o se tulaga taua lona malupuipua aua o tulaga ia o meatotino ia ma mea e faasino tonu lava i le tagata lava ia. O lona uiga e

taua lona puipuia, puipuimalu, ia aua ne i i ai se avanoa e oo atu ai i tua ma faaaogasese e isi tagata. E taua tele la le tulaga lea e pei ona aumai ae o le online lea ou te talanoa ai au ma agai ai o le tekonolosi lea e faaaoga i i.

Ou te auai i le tulaga o le faamama o tatou lola pei ona ou fai atu ona e tataua ona faataoto mai a tatou lola palota i se tulaga lelei. Tagata palota o lea itumalo ma lea itumalo ma latou foi o lo o i ai i Samoa nei. A faaaoga la le online i Samoa ia e pei lava ona silafia... O si matou itumalo e le tofu computer uma isi aua o computer e faaaoga ai le online registration. E talitonu foi e faapena foi isi itumalo. E lelei la Samoa a faapea e le mafai ona faaaoga sau computer ma taumafai mai le resitala lea online o lea e mafai ona e agai mai i Mulinuu i le tatou Ofisa Tutotonu. Agai mai i Mulinuu e faatino ai tulaga uma o lo o manaomia mo le resitala. Ia o lea e maua pei e i ai polokalame ma fuafuaga a le tatou Ofisa e agai i tua... agai i tua i itumalo taitasi pei o lea ua faataoto mai le polokalame ma faasalalau mai. Ae manatua foi lau Afioga, e le avanoa uma foi tagata i aso ia e agai atu ai i tua ma aso faatulagaina mo lea itumalo ma lea itumalo. Ona e i ai tagata faigaluega agai mai i Apia. Ia e i ai isi e i ai o latou tuatua ia pe malaga atu foi i fafo.

O le isi tulaga lau Afioga i le Minisita, o le tele o tatou tagata foi ia o lo o agai i galuega faavaitaimi. O latou la na, e taua tele, e aoga ai le tatou online aua e mafai... e uma le latou taimi toe foi mai i Samoa e faatino le tulaga lea. O le tulaga la o le Tulafono e pei ona taoto nei i lau vaai e le o i ai se tulaga faailoga tagata. O lea e faataua uma aiatatau a tagata, tagatanuu o lo tatou atunuu mo le latou aia e palota ai. O le aia e resitala ai e faatino ai le palota. E leai la se tulaga faailoga tagata faapena po o le faailoga foi lea i se tulaga e le o aofia ai nisi vaega o tagatanuu pe taofia ai mai le faatinoga o le aiatatau. O lea e maua uma avanoa tutusa. E oo foi i tatou tagata o lo o aumai i fafo lea e maua le avanoa a malaga mai i Samoa lea e mafai ona resitala.

Ae o le atugaluga i le tulaga o le online registration o le faamaoniga. E tasi lea vaega e fia oo i ai se talanoaga, sau tautala i le vaega o mea ia o faamaumauga ia e aumai online i le tatou Ofisa Tutotonu. Aua e le o natia o lea e silafia a e talosaga mai e resitala oe e te palota e manaomia le faamaoniga o oe o le tagatanuu. Afai la o oe lea e te talosaga mai fafo, e moomia le faamaoniga o lau sitiseni po o tagatanuu Samoa, e moomia lau pepa fanau. Afai lea e te resitala mai i lou suafa matai, e te fia palota e faaaoga lou suafa matai e te palota ai, e moomia lau pepa matai, poo lau matai certificate foi lea e aumai mai le tatou Ofisa o Fanua ma Suafa e faamaonia uma ai tulaga na. Atonu la e mafai ona aumai i luga online ia faamaoniga na ae tataua lava ona i ai se galuega a le tatou Matagaluega e verify ai, pe moni ma faamaoni ia faamatalaga ma ia faamaumauga e aumai online.

O le mea lea ou te matau atu i le Tulafono Tau Faaofi ma o lea foi na saunoa faamalalalama i ai lau afioga i le Minisita, e le mafai ona fai mai online mo biometrics po o mea ia o le puega o le ata ma mea ia o fingerprints. E tataua lava ona malaga mai i Samoa nei e faatino ai ia tulaga na o le tasi la lea tulaga e pei ona ou fai atu ai, e faigata tele i lou lea taofi faa-sui usufono aua e malaga mai

faataunuu mea ia ae le i tapunia le lola toe foi i fafo toe malaga mai lea i le aso o le palota. Ia o mea ia e faapena atu se tala e silasila i ai lau afioga. O le isi mea taua o le residence aua o lea e pei e manino i le tatou Tulafono, e te palota i le afioaga ma le itumalo lea e i ai lou afioaga lea e te alaala ai. Ia o tagata ia afai e taumafai mai latou i le resitala i fafo ia e fesiligia la po o fea le tulaga tau residence aua o lea e faaoga mai i le Tulafono po o fea e agai i ai, o fea le itumalo e resitala agai i ai. E talitonu e leai se finauga tele pe a apalai mai pe talosaga mai e palota i le suafa matai aua o la e silafia le afioaga ma le itumalo. A o le tagata la lea 21 agai i luga e le o se matai ae talosaga mai e fia palota mai iinei, o fea la le itumalo e resitala i ai? A fua la faapea o le nofoaga lea sa nofo ai mulimuli malaga ai i fafo, ia tailo. Ou te le iloa i ai pe a faapea e manino lena mea. Ae po o lea foi la se evidence a o se faamaoniga o i sa nofo ai ia a ua le toe nofo ai foi.

Ia e i ai mea o luitau e pei ona ou fai atu e lelei le tekonolosi ae i ai foi luitau e tatau ona silasila ma o tatou fua fua i ai po o lea se tulaga o se tatou tali i ai i mea o luitau faapea o lo o afifi mai ma tau mai i totonu o le tekonolosi fou ia tatou te feagai ai ma o tatou taumafai e fai. O tulaga na pei e atugalua ai lou sui usufono aua la a fua ia i latou foi ia e i fafo, e faigofie lava ona tuu mai i luga online le manao, ia ae fiu e tatali e le omai i Samoa nei e fai biometrics ona tumu ai fua lea o le system ae uma a'e e toaititi lava i latou e malaga mai i Samoa nei e faatino lea faamoemoe. Seiavagana ai ua malaga mai i se faalavelave a le aiga ona maua lea o le avanoa e faataunuu ai le second part lena o le registration but e resitala mai fafo.

E pei la o vaega ia lea agai atu ai lau... po o le a se tulaga i se faamalamalama a lau afioga i le tulaga lea. E ala ona ou taua le vaega lea o le tele o i latou foi ia e ono talosaga mai i fafo. Aua e leo na ma le laina le tulaga lea a silasila i le faitauga aofai o tagatanuu o lo o i Niu Sila aua o la e vaevae mai i ituaiga foi ia e i ai la tatou Samoa, o le fuainumera o le matua maoae le toatele o tatou tagata i Niu Sila e faapena foi Ausetalia ma Amerika. O le mea lea ou te vaai atu iai i faitauaofai ia e pei e foliga mai ua toatele atu tatou Samoa ia o lo o afifio ma papaa o i fafo nai lo o tatou lea i totonu o Samoa nei. O lona uiga la i lau vaai ma lau fua faalemafaufau i ai i le mea lea ua faatulai mai o le a matua toatele a i latou o le a talosaga mai ae lona uiga o mea masani lava ae uma ane e toatele a e le omai e fai faauma mea ia o fingerprints ma pue o latou ata. Ia o vaega ia pei e atugalua ai foi lou taofi ma lou sui ina ia silasila lelei i mea na, o isi a vaega e pei ona ou faiatu i le faamamaina o le lala ma isi mea o la e lelei e tatau ona tatou agai e faatino mea na. E pei foi ona ou fai atu a online a i nei Samoa a o la e i ai se faaletonu e mafai lava ona agai mai i gatai i i e faatino ai isi vaega. A o le online mai la i fafo e tele la luitau e feagai ma i latou ia o lo o papaa o i atunuu e mamao, ia ma le tulaga mulimuli o le fua i le taimi...

**Susuga Hon Laauli Leuatea Polataivao Fosi (Minisita mo Faatoaga ma Faiga Faiva):** Lau Afioaga i le Fofoga Fetalai, o sina mea lava e fia faamalamalama faamolemole.

**Tofa Hon LAUOFO FONOTOE NUAFESILI PIERRE LAUOFO:** O le taimi lea ou te talanoa ai...

**FOFOGA FETALAI:** Malie lau Afioga i le sui usufono mamalu leaga lea ua tulai mai le afioga i le Minisita e faauilavea.

Ia tulai mai lau afioga i le Minisita e faaauau lau saunoaga.

**Susuga Hon Laauli Leuatea Polataivao Fosi:** Faafetai. O sina mea laititi lava e fia faamalamalama ona o le tulaga i le tatou resitala mai fafo, ia ona o lea faapea ina ne i te i ua fufula ai le Lola ae le omai e fai ia lima ma ata. Ia o la e tapuai mai nai o tatou aiga uma i atunuu e mamao. O le tuualalo e leai lava se isi e agai mai e resitala e leai sona loto e le fia auai i le lisi. Ina ne i te i ua tatou faapea e maimau ai le taimi e tatala ai fua le online i fafo ae le mafai ona omai e faatino le tele o mataupu o le agaga le faamoemoe atu o lena foi ua silafia e le Maota le faamoemoe o le amanaia o palota a tagata la e nonofo i fafo. O le online la, e mafai ona online ai i nei online ma fafo. O lou talitonuga ina ne i atugaluga le sui usufono, e ave le avanoa o le taimi e sau ai le tagata mai fafo e resitala i nei ua ia talitonuina o lona loto ma lona fatu atoa e sau e faatino mea ia. O si au fesoasoani atu lena i le sui usufono ina te i ua o tatou faapea e maimau fua le taimi e tatala ai le online mai fafo ae le omai e faatino uma le tautinoga ina ia i totonu o le lisi. O le mea lena tatou faalogo ai ananafi i le Komesina seiloga lava e i totonu uma le atoaga o ou lima ma lou ata ona tuu loa lea o oe i totonu o le lisi, a o le online ua tatala le avanoa e te resitala ai. Ma le agaga faaaloalo.

**FOFOGA FETALAI:** Ia tulai mai le sui usufono mamalu e faaauau le saunoaga.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai ia faafetai i lau afioga, ia a o mea faapea e tata lava ona fuafua atugaluga lea ou te talanoa atu ai. Ou te le o faiatu e leaga le mea lea po o ou fai atu e le taua ai fua nai o tatou tagata o lo o afifio ma papaaao i fafo, o lea e agai lau talanoa i le system ma le faatinoga ma luitau o lea ou te talanoa agai i luitau. Ae ou te le o talanoa atu i le mea lea o le fufula ma le a ma le a. O lea ou te talanoa atu i luitau ina ia... o le a se saunoaga a le Minisita po o a ni tapenaga a le Matagaluega i luitau e feagai ma le Ofisa. Ia o se taimi aua e talitonu o lo o i ai foi finagalo o isi sui usufono o lo o fia faaalia, aua ua ova i le 100,000 afe tagata...

**FOFOGA FETALAI:** Toe lua minute o le sui usufono.

**Tofa Hon LAUOFO FONOTOE NUAFESILI PIERRE LAUOFO:** A tatou tilotilo ma tepa i tua i le 1962 faasolo mai ia ua ova i le 100,000 ia tagata o tatou tagatanuu o lo o i fafo. E le faigofie la. O le mea lea na agai atu i ai lau talanoa afai ua ova i le 100,000 po o le 150,000 tagatanuu o le tatou atunuu o lo o i fafo po o ua 200,000 pe sili atu, ia o le popolega la lena ona o le taimi lea

e totoe. O lea ou te malamalama o lea ua ou faalogologo atu o le mau a lau afioga i le Minisita ma le Malo o lea e lava le taimi a o lau la mau e le o lava le taimi. O le tasi lea ou atugaluga i le tulaga lea. Ae silasila i ai i le tulaga lea o fautuaga ia e avatu mo luitau. O luitau la ia lea e mafua ai ona ou popole au i le tulaga e ono tulai mai.

O le tatou system ua obsolete. Ia, o le obsolete lava, o lona uiga ua outdated ia o lea foi ou te talanoa au ia i isi IT ia e feofeoai solo o lea lava e mafai ona faaoga le system, pau lava le mea ua tuai e tataua ona toe upgrade, o le latou foi lona mau. Ae lafo atu faapena atu o lea e mafai ona silasila i tulaga ia ina mafai ona faaoga ma toe fai a tatou Lola ia lelei ae o iai la luitau po o challenges ia i le faaogaina o le tatou online system. O lo o i ai luitau na e pei ona ou talanoa atu, ona faapea atu lea o se tala lau afioga i le Minisita ou te lagolagoina lava le tulaga i le toe faafou o le kiligi o tatou Lola ma mea na, a o le online la lea e aumai i ou te le lagolagoina le online system lea. E tataua ona toe tapena lelei i mafuaaga lona na ou avatu i mea o luitau aemaise lava le taimi lea ua ou faamauina ma lou faalogologo atu, o le mau lava ma le talitonuga o le Malo o la e lava le taimi, ia ae ese ai foi la lou talitonuga.

Ia lau afioga i le Fofoga Fetalai faafetai mo le avanoa.

**FOFOGA FETALAI:** Ia ua faamalo saunoa, faafetai i lau afioga i le Sui Taitai.

Ia se i tulai mai lau afioga i le Taitai o le Itu Agai...

**Susuga Hon Tuilaepa Fatialofa Auelua Sailele Malielegaoui (Taitai o le Itu Agai):** E na ona faafesili atu i lau Afioga, o lea lava e tumau le tai lua avanoa a?

**FOFOGA FETALAI:** I le a le itu lea e te fesili ai lau Afioga? Leai e tasi lava le avanoa o le tagata e tulai ai.

**Susuga Hon Tuilaepa Fatialofa Auelua Sailele Malielegaoui:** O le talanoaga o Tulafono e tai lua avanoa...

**FOFOGA FETALAI:** E leai o le faitauga faalua lona e te sese mai ai, ae tasi lava le avanoa. O mea taitasi o i ina faatoa maua ai avanoa tai lua.

Tulai mai se sui... Ia tulai mai lau afioga i le sui usufono mo Aleipata Itupa i Luga.

**Afioga FUAAVA SULUIMALO AMATAGA (Aleipata Itupa i Luga):** Ia faafetai lau Afioga mo le avanoa i lenei foi taeao ua maua le avanoa taua e faafeiloai atu ai i lau afioga i le Fofoga Fetalai, aemaise foi le Tamaitai Palemia o le Taitai o le Maota, aemaise foi le Vasega o le Kapeneta i Minisita ma Minisita Lagolago, ia aemaise foi le Taitai ma le Sui Taitai o lenei Itu, le mamalu i alii ma tamaitai sui usufono.

E faafeiloai atu foi i le vasega ma saofaiga o Ofisa Sili o Pulega o Matagaluega ma Faalapotopotoga a le Malo, aemaise foi o malo ma le mamalu o le atunuu

ua tatou faatasi i le Maota Fono i lenei taeao. Ia o lea ua saunoa nisi o sui usufono e faafeiloai foi i le paia ma le mamalu o si o tatou atunuu i ona tulaga faalupe ia mai lava i mauga tetele seia oo mai i mauga iti. Ia a o lenei avanoa o le a le toe oo i ai se faamatalaga ona o lea e vaavaai atu e laitiiti lava le taimi e taumafai atu ai se leo o lenei itumalo.

Faafetai o lea ua saunoa le Afioga i le Minisita faapea foi ona faaopoopo le Tamaitai Palemia i le aano ma le auga o lenei Tulafono. O lea ua saunoa atu foi nisi o sui usufono o lenei itu i tulaga i atugaluga lea foi sa faafogafoga ai le paia o le tatou Maota i le aso ananafi. O lea foi sa taumafai mai le Faalapotopotoga po o le Ofisa foi o lo o nafa ma le matafaioi e faamanino nisi o tulaga. Ia e i ai lava le lagona vaivai ma le faatauavaa o lenei itumalo o lo o tele pea nisi o faafesili e le i mafai ona faamalieina ai so matou vaivai. Ia ma o le tulaga la lea e taumafai atu ai e taatia atu pea i iina i le Malo i le afioga i le Palemia ma le mamalu foi o le Kapeneta e toe lauliliu i ai le latou silasila. O lea ua manino le folasaga a le alii Ofisa Sili o le tatou Faalapotopotoga o Faiga Palota e 18 masina lea ua faataatia mo le faatinoga, ia o se taimi mulimuli oo atu i ai se faamatalaga i nisi o luitau i tulaga ia ma se tuualalo a lenei itumalo o Aleipata Itupa i Luga. Ae o suiga (changes) e lelei suiga pe afai lea ua maeaea lelei i sailiiliga i ni pefea e ono tulai mai. O le uiga o lea faamatalaga tatou te au tilotilo o le a se leleiga ina ia faafaigofie ona faatino le galuega, e filemu ai le aufaigaluega e filemu ai foi le faatinoga e Samoa ia ma o le a faapea foi ona fesoasoani i le tulaga o le tamaoiga i se tau e faatino ai le galuega (cost benefits). Ae pei o nai itu ia e toe autilotilo iai.

O lea ua saunoa manino le Tamaitai Palemia faapea e le mafai ona toe tolo e le mafai. O le upu na maua ananafi ua obsolete le system po o le polokalame lea e faatino ai le... O lea foi ua saunoa le matou Sui Taitai e tele foi nisi o IT ma tagata foi i lea tomai, ia o le tulaga lea ae...

**Afioga Hon Fiamé Naomi Mataafa:** Lau Afioga...

**FOFOGA FETALAI:** Ia malie le sui usufono ona o lea ua tulai mai le afioga i le Tamaitai Palemia, ia se i tulai mai lau Afioga i le Tamaitai Palemia.

**Afioga Hon Fiamé Naomi Mataafa:** O le mea e fia faasa'o pe fia faamalamalama atili. O lea na saunoa mai le sui usufono ua ou faapea atu e le mafai ona tolo. O le faamalamalamaga sa ou tuuina atu pe tatou te faaauau, e i ai ona pefea pe a faaletonu le tatou lisi ona afaina ai lea o le tatou faiga palota. Ma o le call lea a le Malo. O le ala lea ua fai ai le faaiuga lea, aumai loa le Tulafono e sui, ona e le moomia le tatou oo i se tulaga e alu alu le tatou tapenaga mo le faiga palota ae faaletonu mai le tatou lola tuai i lona tulaga lea e i ai nei. Tau ina faamalamalama atili i lau Afioga.

**FOFOGA FETALAI:** Ia, lau Afioga i le sui usufono mamalu, lea ua malie lou... le saunoaga a le Palemia.

**Afioga FUAAVA SULUIMALO AMATAGA:** Ia, faafetai lau Afioga, faafetai foi i le Tamaitai Palemia. O le a le oo i ai sau faamatalaga. Na o le pau lava lea o le tulaga pei na ona quote atu foi lele i le saunoaga ina ia silafia foi e le tatou Maota o le naunautaiga lea o le Malo, e le mafai ona toe delay le faatalanoaga o le tatou Tulafono.

Ae o le a tau agai atu se faamatalaga i totonu foi o se vaivaiga ma se faatauavaa e fesoasoani foi aemaise o le tatou Ofisa o lo o nafa ma le faatinoga lea i le tulaga lea aua o lea ua aumai ua aumai ua obsolete, ae ou te iloa foi o lea foi ua saunoa i le outdated. E mafai lava aua so o se system lava, o lea foi ua manino le saunoaga a le Tamaitai Palemia, so o se taavale lava e alu, e faaletonu le afi ma mea faapena. O lona uiga e manaomia taavale fou. A o le uiga la lea o le faamatalaga, e i ai foi lava isi inisinia e taumafai lava e fai le afi lea ma faaauau atu ai.

O le timeframe lea e avatu ai se faamamafa, o le taimi. A o le taimi la lea pe gafatia le 18 masina lea e fai uma ai le process lea, le implementation o le Tulafono ma le system lea ua agai i ai. O le tulaga foi lele, e mafai lava ona... ou te le o malamalama tele i ai i le system lea e faaoga i le taimi lenei, ae o le tele foi lava o system e faaoga e faalapotopotoga, o banks ma mea faapena, e i ai lava mea o modules foi lele e mafai lava ona toe upgrade, pe a faapea ua outdated lea vaega e faaauau atu ai le tulaga lena. E tai pei lava o le faatusa na aumai e le Tamaitai Palemia, a faapea o le taavale, a faapea ua puni le kapalaika, ia sui le kapalaika fou ma mea faapena, e faaauau atu ai le tatou faiga palota, le system lea ina ia mafai ona sui atoa le taavale fou, a o lea lava na taumafai atu ai mo lenei taimi, le taimi lenei mai le 2025, 2026 loa faaoga. Ae pei o se uiga lena o le faamatalaga, aua ou te iloa foi o la e silafia lelei e le Matagaluga, ia e i ai lava tapenaga foi nei sa tatou talanoa i ai ananafi e mafai ona faaoga le information la e i ai nei le database o faiga palota ia import, export po o le migration le mea lea e aumai le isi system i le isi system. E mafai foi ona galulue ai le Ofisa e fai se polokalame foi lele e taua o le mea o le domain o le SQL e mafai ai ona transfer uma system ia e lua ina ia feofoeai e faafaigofie ai le latou galuga. Ae pei o nai mea ia foi lele o lea e avatu ai se tuualalo ona o le taimi, le taimi lava lea tatou te talanoa ai.

O le isi tulaga, o le tatou online, le resitala lea online, e taua tele le faataitaiga lea na saunoa ai le Tamaitai Palemia, faatau loa le taavale fou. E pei ona avatu i le amataga o le folasaga a lenei itumalo, e lelei suiga, ae pau lava le tulaga, ona o le taimi afai la ua faaoga le system fou lea, lea ua faapea ua le toe aoga le system tuai, lea ua faatau le tatou taavale fou. A o le tuualalo a lenei itumalo, e a pe a ave le faamuamua i ē o lo o nonofo i Samoa, la'u muamua tatou aiga ia e i Samoa i le tatou taavale fou, ne i te i ua la'u la'u mai atunuu i fafo toe palalū le tatou system, a o lea e le i uma lava ona la'u la'u tatou aiga nei e i Samoa. Na o se tuualalo, ae pei ona avatu se faamatalaga, e taua suiga mo le agai i luma. Ae mo le faatinoga, le implementation lea e autilotilo i se tulaga foi lele e more practical e mafai ona faatino i totonu o le taimi lea.

O le tele o isi atugaluga lea ua saunoa i ai le matou Sui Taitai, ae pei o tulaga lava ia o nai atugaluga ia e le gata i le system, a o le faatinoga lea e i ai taimi a faagasolo i nuu i tua ua gasolo mai tagata e faigaluga, o atu ua le maua, toe o



atu i lea taimi ma mea faapena. E tele matafaioi a le mamalu o le atunuu o lo o nafa i taimi ia, aua e le faapea e faataatia atu loa le polokalame a le Matagaluega po o le Ofisa ua taofi uma loa galuega a nuu se i o atu e faatino le mea lea. E i ai lava feteenaiga ma mea faapena e le mafai ona ausia.

O le isi mea taua, o le tulaga lea po o le a le tatou Plan B. O lea ua uma ona saunua le Ofisa Sili o Pulega ananafi, o lea ua uma ona faataatia, o le masina lea ua tataua ona uma le vaega lea e tau mai le masina lea. Faafetai i le tapenaga, faamalo foi i le Afioga i le Ofisa Sili o Pulega i ia fuafuaga uma. Ae taatia atu pea na o se tuualalo a lenei itumalo, po o le a se isi fuafuaga pe a faapea e aafia si o tatou atunuu i mea ia tau natural disasters. O i ai se Plan B e tapena ai i le tulaga lea? Tatou toe autilo i le 1990 ma le 1991 ia Ofa ma Valelia, leaga uma uafu, leai ni auala, toetiiti uma le tausaga e le i faia ni auala e alu i Aleipata, motusi atu lava i i Anoamaa seia tau i tua. E faapefea ona tapena le tatou o lea i tua e faatino. O lona uiga e 2 masina, 3 masina o tapena fuafuaga ia, toe faaleleia communication, toe faaleleia satellite e fai ai le online lea e i ai tatou dish faaleleia auala e gasolo ai le aufaigaluega i tua, faatalanoa ma nuu. O le a se fuafuaga o taatia i tulaga ia. O le uiga o le faamatalaga, afai sa tupu, e ono toe tupu. E sosoo lava tausaga ia e lua. O le 2024, o lea tatou te le i oo i le faaiuga o le 2024 i le taimi o afa ma matagi. O le 2025, lea tatou te le i oo foi i le season o afa ma matagi. O le a se tatou tali pe a faapea e sosoo lava tausaga ia e lua ua taunuu mai tulaga i puapuatia faapea?

Ia pei o nai vaega ia o lea e avatu pea e tapenapena ai foi le tatou Ofisa e fetuunai ai foi i tulaga o le tapenapenaga i tulaga ia, aua there is a possibility e ono tupu se mea faapea, ae na ona taatia atu pea i ina mo le lauliliuina. O le implementation lava lea aua o lea ua avatu se faamatalaga, e taua le suiga i le system fou ma mea faapena. Ae a pe a tatou fai vaega, resitala muamua tatou iinei i Samoa, fai le migration lea i totonu o le system fou lea ia vave. A uma loa, ia faagasolo atonu e le iloa pe fetau lava le oo atu i lena taimi ua tau amata ona fai le online mo i latou ia o lo o alaala ma papaaao i fafo, ia ona faaoga mai lea o le latou... aua o la e silafia, e le faapea a resitala mai ona otometi lava lea ona i totonu o le lola. E toe totogi foi lou pasese e te sau e fai biometrics, o lou ata, o ou fingerprints, ia ma mea uma lava faapena faatoa mafai ona satisfy le agaga o le Tulafono, aemaise tulaga ia foi lele o le residence. Aua o le isi i lau iloa e alu atu lava e le i nofo i se nuu, le iloa pe sa rent, pe i ai sana freehold property iinei i le taulaga. Afai la o lea ua matai, e faafaigofie le galuega o le verification a le Ofisa o lea ua iloa ai le itumalo o lea e matai ai. A o le vaega foi lele o lea e tau e tatou o le maumausolo, nonofo i le fanua o lea aiga tumasina tutuli, nonofo i lea fanua rent atu i lea mea, ia o vaega la ia e faigata ia ona faatino le galuega a le aufaigaluega, verification.

O lea foi sa maua ananafi le tulaga lea e i ai mea e ono tutupu i faalapotopotoga foi lele ua aoao e nisi omai faatasi omai lava lea fai le resitala faapea tatou te o tatou te palota uma ia Aleipata Itupa i Luga i le latou sui la e i ai. Tainane lava e leai se sootaga, leai se piitaga, ia, a o nai luitau ia e taumafai le Ofisa ia mautinoa o tagata lava ia o tagata Aleipata Itupa i Luga.

Ia, pei o nai vaega ia, leaga o lea ua omai nei e fai fingerprint ma pue latou ata, a o le identify ina la o le piitaga o tagata i itumalo ma nuu, ia o le isi lena

luitau. Ae taatia atu pea faapena. O le tulaga foi lele o le domination o le lola, po ua tele tagata i fafo, ia, ou te iloa e leai se mea o le a mafai i ai, ona na o le pau lava leni o tatou, na o le 200,000+ tatou iinei i Samoa. Afai e ova atu ma le 200,000 i le 300,000 tagata o lo o i atunuu mamao, ia e leai se mea. Pau lava lau faafesili, e faapefea ona fai le treatment, ia fair le treatment o tagata sitiseni o la e i Samoa ma tagata sitiseni o la e i fafo. Afai o la e dual citizen tagata ia, lona uiga e mafai ona palota i Niu Sila po o Ausetalia, ma mafai ona palota i Samoa. O le a le fairness o le treat ina o le aiatatau a le Samoa lea e nofo iinei? A le palota le tagata lea ua uma ona resitala, le tagata lea e nofo i fafo i Niu Sila, Ausetalia po o Amerika, le palota, e faapefea ona apply le penalty? E o lava le tatou Ofisa e sue mai o e sau e totogi le sala? Le treatment lea lea e fai e i tatou lea e iinei i Samoa. A e le palota e tusa ma le Tulafono, e i ai lou faasalaga. Ae faapefea la le tagata lea ua uma ona resitala oo atu i le aso e fai ai le palota faapea, 'ia, sorry ua leai sou pasese, ua ou le alu atu, ia po ua ou lelava foi, ia po ua sui foi lou mafaufau.' E faapefea la ona apply le vaega lea o le Tulafono? O faasalaga la o latou lea ua i le lola, aua o le upu lea e sau i totonu i i o le compulsory, faamalosia, compulsory registration lea o voters, faamalosia le resitala ae i le faamauina lea o igoa. Afai e compulsory ne i te i foi ua uma ane sau le lisi na o tatou lava lea e iinei e toe aoao atu nai seleni, pe tai \$100 ea pe fia le faasala. Ae faapea ona tulituli la le outstanding lea ia i latou o lea e nonofo i o. O lau iloa o lena tou te silafia, o le faigata ia o lea mea o le lua o ni masters e te serve ai, ua e le iloa po o ai e te faamuamua, pe te faamuamua po o Ausetalia po o Amerika pe te faamuamua Samoa. O le faigata ia. Ae i ai foi le Gagana Palagi foi lele, ia aua o lea lava o lo o faapea, o lea matou te tautua mai i Samoa. E sao. Fesoasoani mai, maua mai tupe, fesoasoani mai tulaga ia. Ae i ai lava le eseesega ma le tautua a le tagata o lea e nofo tuavae iinei i Samoa. E i ai le eseesega, o taimi uma, aso uma, o le tautua a le tagata lea e iinei. E i ai lava la si eseesega ma le tautua a tatou uso, tina ma tama, o tuafafine ma i latou uma o lo o alaala ma papaaao i fafo. E i ai le Gagana lena Faaperetania, o le out of sight out of mind. O oe lea e nofo i Samoa, e te vaai atu loa i le mea faaletonu, migo.

**FOFOGA FETALAI:** Toe lua minute o le sui usufono.

**Afioga FUAAVA SULUIMALO AMATAGA:** O le faigata ia ona talia e le tagata lea i fafo leaga o la e le o vaai ma silasila i ai. E pei o le uiga lena o se faamatalaga foi lele. Ae pei o tulaga ia po o le a le treat ina o tatou uso ma tuafafine le vaega lea dual i latou sitiseni, e lua sitiseni, pe faifaatasi lava tai pei o tatou ia ma tulaga uma faapena.

O le isi tulaga, o lea ua i ai le tulaga lea i suafa matai, aua ou te iloa, o le tele ia o matai i le taimi o aso fiafia na uma nei, ua ou iloa pe ova ma le 1,000 ni matai sa faatino. Ia, o le verification lea e taumafai atu ai se faamatalaga, pe ua lava le suafa matai lea e otometi ai la lona qualify i totonu o le tatou lola. Na o se faafesili. Afai o se tagata e le sitiseni, aua o le toatele lea, uma le first generation i Samoa, second, third, fourth, lea ua omai e fai matai. E avea la le

matai lea ma se mea ua otometi ai ona maua latou sitiseni, ia po o le mea seiloga lava ua faamalieina tulaga foi o le tatou sitiseni ma mea faapena.

O nai motugaafa e faataatia atu pea i le mamalu o le tatou aufaigaluega, aemaise o le Malo, le faiga o le verification lea. Aua e sau loa le isi, o au lea ua uma ona resitala lou matai, fai au fingerprint ma mea ia, ua tataua ona i totonu o le lola. E pei o nai tulaga na se i toe silasila ane ai i tulaga ia, aemaise lava o se mea e faafaigofie le galuega a le aufaigaluega, something that is more practical. E faafaigofie ona fai le galuega i le agai i tua, faatino, aua e manino lava le matou itumalo, o lau iloa e toe gasolo uma mai lava iinei e fai ai le resitala, e le o practical le online i tua i Aleipata, aua o le tulaga lea seiloga ua well set up se infrastructure, o la e ua i ai computers ma mea faapena, aua e oo lava i aoga o la e le i iloga ona i ai se tulaga o ola ai ni computers e mafai ai ona faatino galuega faapea. Ia a o lona uiga, e faafaigofie la i le matou itumalo, e ui ina mamao, ae o lo o mafai lava ona omai iinei e fai ai le resitala ma fai tulaga ia. Ae ou te iloa o le a tau mama o le a le toe fai mai ni tusi foi ia a faifeau e faamaonia, tusi a pulenuu, ia ae pei o le migration lea mai le tatou old system lea ua faapea ua obsolete, e toe migrate mai totonu o se system fou lea a tatou o lo o tapena nei, o le a faafaigofie ai ona logo atu loa lea o le matou itumalo e gasolosolo mai e toe tapue ata ma fai Id ma tulaga uma faapena. O lau iloa e tele nai vaega ia o lo o i ae ou te iloa o se taimi toe maua foi se isi avanoa. Ae o le tulaga lea e pei ona saunoa lau Afioga i le Fofoga Fetalai, faafetai mo le avanoa. Faafetai foi i le tapuaiga a si ou itumalo.

Ia na o le pau lena o nai motugaafa ua taumafai i ai i lenei Tulafono Tau Faaofi. Ia ma le agaga faaaloalo tele lava, ia manuia le fonotaga a Samoa.

**FOFOGA FETALAI:** Malo faafetai. Malo saunoa i lau Afioga i le sui usufono mamalu mai Aleipata Itupa i Luga mo lou sao foi i le tatou Tulafono Tau Faaofi.

Ia, o le a faaauau nisi saunoaga pe a tatou taliu mai le tatou malologa. O le a faataatiaese Galuega a le Fono Aoa mo lana malologa masani o le taeao.

*Na faataatiaese Taulumaga a le Fono Aoa Faitulafono mo lana malologa masani i le itula e 10:48 i le taeao ma toe faaauau i le itula e 11:30 i le taeao.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Faitulafono.

I le toe taliu mai ai o le tatou malologa o le taeao, e i ai le manatu ua matu i fau le tautega ma le taligasua a le paia o le tatou Maota ua maua foi se faasiliga malosi e faaauau ai le tatou galuega.

E faataatiaese tatou Taulumaga mo le malologa ua maea le saunoaga a sui usufono mo Aleipata Itupa i Luga. Ia o le avanoa lenei mo se tasi o sui usufono e fia saunoa.

Ia, o lea ua maitau atu o lea ua mua mai le sa o le Sui Usufono Tamaitai mai Alataua Sisifo. Ia o lou avanoa lenei lau Afioga i le sui usufono mamalu.

**Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai - Alataua Sisifo):** Faafetai mo so matou avanoa. E faatalofa atu i lau Afioga i le Fofoga Fetalai ia faapena foi lena itu o le Maota i le Afioga i le Tamaitai Palemia, o Minisita o le Kapeneta, o Afioga foi i Minisita Lagolago ia faapea foi lenei itu i le afio o le Taitai ma sui usufono o e o lo o agaia le Faigamalo.

E faatalofa atu foi i Ofisa Sili o Pulega o Matagaluega ma Faalapotopotoga ia faapea foi Samoa ua tatou auai faatasi i le Fonotaga a le Palemene i lenei taeao.

E faatalofa atu foi ma ofo alofa atu i si o matou Itumalo o Alataua Sisifo aemaise o tina uma o Samoa o e ana le Nofoa lea ua ou seei ai i le Maota. Ae se i taumafai atu se vaivai o lenei usugafono i le tatou Tulafono Tau Faaofi e pei ona opea nei i le Maota.

Faafetai i lau Afioga i le Minisita, e taua mo le fesuiaiga o systems aemaise lava pe a faapea ua obsolete. E pei lava ona sa maua i nisi o saunoaga mea nei o systems ae obsolete. O le atugaluga o lenei sui usufono, o le toe fai atoa o le registration ona o le taimi, aua foi o lea ua tatou malamalama lelei lava afai o se system ae obsolete e tatau lava i lē tusia le polokalame po o lē faia le design ona faafetaui parameters foi nei po o tables o le system tuai agai i le system fou ona extract mai lea pe import mai data ia e manaomia ae aveese ma delete ai loa ma faamama mea e le o toe manaomia. Ona fai ai loa lea o feuiuiaiga i nisi mea e ono manaomia pei o ata ma tulaga na.

Ae pei o le popolega lena i le toe fai atoa ona o le tulaga lea i le Vaega 21 o le tatou Tulafono o Faiga Palota lea e i ai le isi aiaiga lea e tatau ona i ai, o le sainia lea o le pepa faatumu e se Sui o le Nuu po o se Sui Tamaitai o le nuu po o se Faifeau e faamauina ai le nofoaga e nofomau ai le sui lea o le a palota po o le verification pei ona sa taua e nisi sui usufono.

O le popolega lava lena ona o le online registration lea e faataunuu mai fafo, i tulaga lea o le lē mautinoa, aua o lea la o le a oo mai le tagata lea e fai lana palota... oi e faatumu... e fai ana biometrics a o lea e manaomia aua o le isi aiaiga lea o le tatou Tulafono. E tatatu ona i ai le pepa faatumu lea e faatumu e le Sui o le Nuu e faamaonia ai o ia lea o le Sui o se Itumalo. O ai la lea o le a omai e faataunuu le vaega lea o le Tulafono? Aua afai la o lea e sau mai Aukilani o lona uiga e tatau ona sau le Pulenuu o Aukilani e faamaonia le mea lea e nofomau ai le tagata lea po o le a se tulaga e i ai.

**Tofa Hon Leatinuu Wayne Soialo (Minisita mo Faalapotopotoga a le Malo):** Lau Afioga i le Fofoga Fetalai....

**FOFOGA FETALAI:** Ia malie lau Afioga i le sui usufono mamalu se i tuu atu le avanoa i le Minisita o Faalapotopotoga a le tatou Malo.

**Tofa Hon Leatinuu Wayne Soialo:** E fia fesoasoani atu ona o le mataupu lea o le faamaonia. I le taimi lenei o loo faatalanoaina e le Kapeneta le isi Tulafono, lea la e aumai ai aiaiga ia o le faamaonia. A o le taimi lenei na o le mataupu lava tau tekonoosi, le system lea tatou te talanoa i ai aua e le iloa pe te i ua aumai ua le toe moomia ni Pulenuu ma ni Sui Tamaitai ia ae faamaonia

e le Fono Faavae. Ia pei na ona faapena atu lau Afioga ne i te i ua faapea le atunuu o lo o tumau lava le tulaga lea a o lea e le i oo mai le Tulafono lea lau Afioga.

**FOFOGA FETALAI:** O lea ua faafofoga mai le sui usufono mamalu, o lo o i ai tapenaga i le tulaga e pei ona atugalua iai lou finagalo.  
Tulai mai lau Afioga i le sui usufono mamalu.

**Afioga ALIIMALEMANU MOTI MOMOEMAUSU ALOFA TUUAU:** Ia, faafetai o le mea sili o lea ua malamalama, o le isi tulaga lena na fia oo i ai se tala, o le tatou Tulafono Faatonutonu. E tatau lava ona matua manino ma maoti aemaise lava le online registration lea mai fafo. O le verification lava le itu taua lea e fia momoli atu ai se lagona.

O le isi lagona e fia avatu pea pei ona saunua nisi o sui usufono, e avatu pea o matou manatu e matimati ai ma toe faaleleia atili ai le Tulafono, pe toe faateletelegese laitiiti ae ia mafai ona sao atoatoa, i uma ane foi lenei Tulafono ae tele ai foi ni Faamasinoga pe a uma Faiga Palota.

O lea ua saunua le Afioga i le Tamaitai Palemia o le Tulafono lenei ina ia lelei atoatoa ai le system aua le isi Faiga Palota. Ae o le popolega lava lea e i ai o le laitiiti o le taimi, i uma ane ua tele atu la tatou Faamasinoga e tupu mai le system lea pe a le lelei ma atoatoa lona faatinoina.

O le atugalua lea e i ai o nai o tatou tagata ia ua uma ona resitala mai Niu Sila ma isi atunuu, lea e i lalo mai o le 10 tausaga, lea na omai lava iinei i Samoa e resitala ona o le fia palota mai i Samoa nei. A o lenei foi o le a toe omai, le tupe, le tupe lea o le a alu e toe omai ai e fai biometrics lea. E a pe a silasila lau Afioga i le Minisita, tagata uma ia e sefulu tausaga i lalo mai lea na omai e fai uma faatinoga ia ae faatupe e le tatou Malo le toe foi mai, toe foi mai e toe verify lava na o mea ia e lua lea e manaomia aemaise o lea e taugata pasese sa omai ai. O le tulaga lena.

O le isi manatu o le faatagaga lea e ave ai le malosiaga i le Komesina e na te toe faia atoatoa ai le resitalaina o tagata palota pe a uma le sefulu tausaga. E le i taugata tele lea vaega o le Tulafono, lea malosiaga ua tatou ave ai i le Komesina? Aua o le popolega foi lena lea e avatu e lenei itu, le malosiaga la lea i le verify ina o le ata ma le lima lea e tuu i le Komesina, lea foi o le a toe tuu atu i ai ma le malosiaga atoa lea na te toe faia ai le isi registration pe a uma le sefulu tausaga. E le o le galuega ea lena a latou o le faaleleia o le system i tausaga uma, tausaga uma pe a maea le Faiga Palota?

Ona i ai lea o se manatu, lau Afioga i le Minisita se i tagatagai ane lava pe le talafeagai ae faatino muamua lava na o tatou i Samoa nei aua foi e faigofie lava, a tupu mai pefea ona e alu atu lea po o Faleapuna po o fea e aumai le tagata lea e faamaonia. Ae a oo ina tupu pefea a o ē e resitala mai fafo e faigata ona verify. O faamasinoga i le uma o le palota lea ou te popole au i ai, ia ma le tulaga lea e pei ona taua e se tasi o sui usufono, le compulsory registration lea e \$2,000.00 le sala pe a e le resitala, ae \$100.00 pe a e le palota. O fea la le mea lea o le a aoa mai ai e tatou le vaega lea pe afai o lea e fai mai e compulsory? O lona uiga e \$2,000.00 le pasese e toe sau ai e toe faatino uma ia tulaga ia, totogi le

sala, toe sau e palota. Aua o lea ua maua i nisi o saunoaga o lea e agai atu i le online palota. E popole lava lou sui usufono, e le faapea e teena a o le vave o le taimi lea e faatino ai, ina ia faifaimalie ina ia aua ne i tulai mai ni feteenaiga poo ni faamasinoga.

O le isi tulaga, o tatou lea e resitala e sitiseni Niu Sila, toe sitiseni Samoa. Lau afioga o lea e mafai lava ona ota palota, resitala i Niu Sila ou palota ai toe sau foi toe palota i inei i Samoa? O taga lena mea? Pe le tataua la ona i ai la se Tulafono ia tasi lau vote. Afai lava ua e finagalo e te palota i Niu Sila i le mea o lo o e aumau ai ma atiae ai lou aiga, ia palota i Niu Sila. Afai a ua e finagalo e aumai inei Samoa lau faatuatuaga, ia ona aumai lea i inei. Na o se vaivaiga e avatu ai i le tulaga lea o le dual citizenship aua o lea la o le a tailua palota a tagata nei, aua o tagata tonu a la ia o lea e faasino i ai le tatou Tulafono lea.

Ia, o se tala mulimuli lau Afioga i le Minisita e ala i le tatou Palota, o le tulaga lea e pei ona taua e nisi o sui usufono, le tulaga i te i ua i ai ni mea e tutupu. O lea ua uma ona tau faamatala atu, o la e aoga le system na o le extract mai lava o le information la e i ai ae tuu i i amata lea o le tatou online registration na o Samoa e faatino ai muamua le tatou... ina ia mautu ma lelei le tatou Lola aua le isi Faiga Palota ia ona extend atu lea i le isi vaega i fafo atu aua e tele galuega e feagai ma tatou.

Ia, o nai motugaafa na lau Afioga i le Fofoga Fetalai e avatu le faafetai mo lo matou avanoa. Ia o nisi o mataupu e talitonu o le a laga e nisi o sui usufono ma le agaga faaaloalo. Manuia le Fono.

**FOFOGA FETALAI:** Malo faafetai mo le sao foi o lau Afioga i le sui usufono mamalu mo le tatou Tulafono Tau Faaofi, malo lava faafetai.

Ia tulai mai le sui usufono mo Vaimauga 1.

**Afioga SULAMANAIA FETAIAI TAUILIILI TUIVASA (Vaimauga 1):** Masalo ae le i faia se sao o lenei Itumalo lau Afioga i le Fofoga Fetalai e muamua ona faatalofa ma ofo alofa atu le sui usufono o le Vaimauga i le afio o lau Afioga i le Fofoga Fetalai aemaise foi o le Sui Fofoga Fetalai mo le taitaiina o lenei Maota. E momoli le agaga o le faafetai ma le faamalo e le faigofie le taitaiina o le sa o le atunuu. Faafetai o lea ua tatou i ai i lenei masina lona tolu ia o lo o se'e lava le sa o Samoa.

E faatalofa atu foi i lena talaga atoa i le afio o le Afioga i le Tamaitai Palemia aemaise foi le Sui Palemia ma sui usufono mamalu i Afioga i alii ma tamaitai Minisita o le Kapeneta e faapea foi Minisita Lagolago. Faamalo i le faatautaiga o si o tatou atunuu, e leai lava se mala o afe. O le tele o tausaga e amata ifo le amataga o le tausaga ua lutia tatou i mala faalenatura. Ia ae faafetai, faafetai o lo o se'e lava le sa o Samoa e oo mai i le taeao lenei.

Liliu mai i lenei talaga atoa, e faatalofa atu i lau Afioga i le Taitai o le Itu Agai, o oe foi o le Tama Matua o le toe Ulutaia foi o lenei Maota, ia faamalo o lo o faatotoe oe e le Atua e faapena foi ona lagolagosua i le tulai mai o le Faigamalo aemaise o lenei Palemene. Faapena foi le susu o lau Afioga i le Sui Taitai ma sui usufono mamalu o le Palemene o Samoa.

E faatalofa atu foi le sui usufono o le Vaimauga i Ofisa Sili o Pulega o Matagaluega a le Malo ma Faalapotopotoga aemaise outou ua toe faafou a outou konekarate. E momoli lava le agaga faafetai i Minisita o lo o ave pea le faamuamua ia te outou o lo o galulue ai i totonu o Matagaluega. E pei o le tala foi lea, e fia maua a lata i'a ia tuli lava le manu, faafetai atu ai i Afioga i Minisita i le toe filifiliina o outou. Ia o outou mama na, e i ai foi le taimi tou te tulai mai ai.

Ia, i le faafofogaaga foi a lenei Maota i le Afioga i le Failautusi ma le Tamaitai Loia, ia malo mo le tautuaina o lenei Maota. O lea foi ua mae'a ona tali le sua i lenei taeao e momoli le agaga faafetai.

E le i alu se lauga a le Vaimauga ae le i faafeiloai atu foi i le tapuaiga a Le Ao Mamalu o le Malo ma le Masiofo, ae a foi le Sui o le Fono a Sui Tofia ma le Faletua ia aemaise foi o le Afioga i le Faamasinoga aemaise foi o le Peresetene ma alii ma tamaitai o le Faamasinoga. E faatalofa atu ai lenei itumalo i la outou foi galuega.

E faatalofa atu foi i le aufaigaluega paia a le Atua i so o se fatafaitaulaga o ē o lo o nonomanu i le Atua i le tatalo, anapogi ma tulivae aua se manuia o Samoa, lea lava e oo mai i le taeao lenei o lo o manuia lenei Fonousu. E le mafai lava na alu se lauga a le Vaimauga ae le i faamanuia mai si ou itumalo mai lava i Fusi ma Fanuatanu aemaise foi o Lalotea le Malae o le Faautugatagi a Tumua, o Niniva ma Punialavaa ma Falepoulima, ia e faapea foi Pilioua ma Fatutolo ma Falepouiva. Ia tapuai maia se i fai se sao o le tatou itumalo aua lenei Tulafono Tau Faaofi ua opea i le Maota.

E momoli le agaga faafetai a lenei itumalo i lau Afioga i le Minisita o lē e ona le Faiga Palota i le aumai o lenei Tulafono e Teuteu. Ia e le selu atu e le gata o oe o le Minisita o oe o le Loia ae sa e Faamasino foi. O le agaga o le faafetai a le Vaimauga o lea ua e tulai mai toe teuteu mea foi sa i ai le isi Minisita lona fa foi a le Vaimauga i totonu o le tulaga lea. O le agaga faafetai lenei o nisi mea e le i atoatoa i lou uso sa i ai o lea ua e toe sau toe teuteu e i ai le taeao lenei.

E pau lava nai tuualalo a le sui usufono o Vaimauga 1 ia o le taimi lau Afioga i le Fofoga Fetalai, a silasila i lenei taimi e 18 masina ua tuai. Maimau e pe ana e tulai mai loa e taitai le Matagaluega e silasila loa ona faatino loa lea i le 2022, 2023 a o lea ua misi, a o lea faatoa faatino. O le 18masina o le fesili o lava lea taimi? E le gata i lea lau afioga i le Fofoga Fetalai o le tulaga i le aufaigaluega, ia aua lea tatou te... O le fesili foi po o lava lau staff? E tele le galuega o le a toe fai e toe resitalaina uma o le Lola o le popolega lenei o le sui usufono o le Vaimauga. Na faalogologo lava ma le totoia i le saunoaga a le Minisita o Tupe ananafi sa fesili ai i le old system ma le new system pe mafai ona download mai le old system i totonu o le new system lea, o le tala a lau IT, e leai ona ou popo'e loa laia.

Talofa e i le tele o tupe o le a toe faamaimau i le toe resitalaina o nai o tatou tagata. A o ai e pau i ai le avega? E pau lava ia i tatou nei e tulai mai o sui usufono, e leai lava se sui e mafai lava ona alu na o ia se i tulou le mamalu o le atunuu. E fia o lava i le faipule, tatou o i le faipule e ave tatou e tele lava ina avatu faasalalauaga ae o lava i le faipule ona e a? Se i tulou lava, e manao a i sina mea e pasese ai ma se mea faapena. O tatou foi la o le popolega la o le sui

usufono lenei ona o le taimi po o lava, ae le gata foi lea o le a ovataimi ai le aufaigaluega. Na ou faanoanoa lava ananafi faapea ai a aumai e amatamea le resitalaina o le Vaimauga ae fai mai faatoa resitala i le tausaga fou ia Ianuari, Fepuari. O le taimi lena ua tatau ona i ota luma lata Lola a o lea fai mai faatoa oo mai i le Vaimauga i le tausaga fou. E faanoanoa ai. O le isi tulaga e taugata. O le upu lea o le obsolete po o le a lea o le a i ai po o ua faaleaogaina le system pe a e faanoanoa ai ona e a? O so o se system a e tatau ona faatino, e tatau ona fai, download, upload e tatau ona renew a i taimi uma. A o le tulaga lea ua i ai e sao ai le isi tala se i tulou a le Maota nei te i ua tuli foi i fafo le sui usufono. Ua leaga le system a o le tulaga sa tulai atu ai i le tulaga foi la i le Ofisa lea ua i ai nei sa tatau ona alu atu loa faapea ua oti le system fai loa i le taimi lena. A o lea ua toe fai i le last minute ma toe aumai e faanatinati o le tulaga lena e lagona ai le faanoanoa. O tuualalo ia e avatu i lau Afioga i le Minisita.

O le isi o tulaga ona o le taugata o le system. Sa tautino lava le aufaigaluega ananafi o le system o lo o faagaioi o le CSL na ou fiafia laia aua e leai se mea o le a toe aumai ai se isi system fou. O le CSL lea e iinei lava i Samoa toe omai le CSL e toe upgrade le system ma toe fai nisi mea i totonu o le system ina ia faaauau ai pea. O le popolega lau afioga i le Fofoga Fetalai i le tulaga foi a o galue ai i le Malo ma mea faapena i mea nei o system, ina ne i te i ua tatou o po o le a le system lea ua faaoga e run ai le tatou Faiga Palota ae aumaiga le system a lau Afioga i le Minisita o la e po. O lea ua ao tatou a o la e po le atunuu lea e sau ai le system. O le a le mea o le a fai? O le a le mea o le a fai? O lona uiga o lea ua omai tatou ua usu mai e fai palota ae tatala atu le system o la e momoe le mea e aumai ai le system, se i tulou le Maota lenei o tala lava e avatu ai, ona o le tulaga foi lea i e na aumaia le system i atunuu na faatau mai ai le system.

Lona lua tatou te malamalama uma lava i le system o le taugata ia lau Afioga i le Fofoga Fetalai, e tai masina lava ma fai le rent e fia afe e alu i le system a o le taimi foi la e alu alu lava ua poloka le aufaigaluega tapa se fautuaga o lea e aumai ai le system. O tupe a faapea o le a le mea lea ua poloka ai le mea? Pei lava e \$10,000 lea o le a toe avatu ai... ae talofa e, e leai ni tatou tupe. O le popolega lena o le sui o Vaimauga.

O le lona lua, ua uma ona resitala uma lava lola. E lagolagoina le finagalo o le Sui Taitai o lenei itu lea na... maimau e, pe ana faapea o Lola lava la e i ai na o le aumai lava tatou toe agai loa i ai. A o le aumaiga la lea o le a toe aumai atoa ai lava lola o le popolega lena lau Afioga, ona o le a? O nai o tatou tagata lea e omai mai fafo lea na omai i maliu ma tuli e o e resitala a o lea o le a toe afifio mai e omai e toe resitala uma. Taatia ia tatou lea e iinei i Samoa aua e mafai lava ona tatou o atu i gatai ia ma resitala pe omai foi i tua ae o nai o tatou tagata aiga i atunuu mamao o lea ua fai mai e toe afifio mai, o lona uiga o tupe lea o le a toe omai ai e print a latou lima lea e i totonu ma fai tulaga i ata ma itumalo e omai ai ma o latou suafa ona toe foi lea faatoa toe omai i le Faiga Palota. O fea e aumai ai tupe? Ia pei o le fesili lena.

Lona lua o Oketopa next year e uma ai le Paeaiga lenei se i tulou. O le uiga o le tala o le Tulafono lea e i totonu a tatou... e 6 masina e tapuni ai le lola. O lona uiga la o Oketopa next year ia ua iloa sui tauva...



**Tofa Hon Olo Fiti Afoa Vaai (Minisita mo Galuega, Felauaiga ma Atinae Eeseese):** Lau Afioga i le Fofoga Fetalai...

**FOFOGA FETALAI:** Ia malie lau Afioga i le sui usufono mamalu se i tuu atu le avanoa i le Afioga i le Minisita mo Galuega Tetele.

**Tofa Hon Olo Fiti Afoa Vaai:** Faafetai tele i lau Afioga mo le avanoa. E leai na ona apaapa atu lava i le Afioga i le sui usufono mamalu ona o le Tulafono lenei e na o le suiga lava o le system. O isi mau mea ia e tolaulau mai ia o le mea lena e sau mulimuli i le faaaogaina o le system. Ia ma ni functions faaopoopo. Lau Afioga i le Fofoga Fetalai, o lea e maitau atu i le Tulafono lenei ma le faiga o le system o le technology a tatou lea ua tatou oo mai i le 2024 a o le tatou system la e i ai o le 2004. O le eseese la ona o lea ua tele nai mafuaaga fou ma ni mea e tuu i totonu e faaaoga ai le system lea.

O le faaitaiga lau afioga i le Fofoga Fetalai, o tatou lola ia na te'a atu nei o le toatele ia o tagata maliliu sa i ai totonu. E le i mafai e le system lea ona faasa'osa'o le information lena. O lea la ua faatulai mai le system fou lea ua mafaufau i ai le Malo ina ia connect lelei le information lea mai le Ofisa o le Soifua Maloloina i le faiga lea o le aumaiga o le data lea o tagata maliliu. E oo foi la i tatou nuu ma alaafaga i ē foi ua maliliu e le o record ina ua maliliu i tua, o lea foi ua i ai mafaufauga e tuu atu i tua i a tatou Fono Faavae ina ia sa'o lelei le tatou Lola.

O le isi foi tulaga lau Afioga i le Fofoga Fetalai, e tolu a tatou submarine cables ia e i ai, those are just roads. A o le tatou masini lea e fealuai ai lau Afioga i le Fofoga Fetalai, o le masini tuai lava. E tai pei foi lava o le soifuaga nei lau Afioga i le sui usufono. A 21 i le 30 ou tausaga e te vave a lau speed foi lele ae oo loa foi ua matua lou soifua ua tuai ia ona faapena foi lea ona tulei faate'i si au taavale. E faapena le soifuaga ma le mea lea e tau faatusatusa atu i ai le tatou system. O le mea lea malie mai o lea e tau fai atu le tatou system lea ona tatou iā faatasi loa lea i ai i le faaaogaina o le system. Ma le faaaloalo.

**FOFOGA FETALAI:** Ia se i tulai mai lau Afioga i le sui usufono mamalu e faaauau le saunoaga.

**Afioga SULAMANAIA FETAIAI TAUILIILI TUIVASA:** Faafetai lava i le faauilavae a le sui usufono mamalu le afioga i le Minisita Sinia foi. Ia o lagona o le faanoanoa lau Afioga ona o lea e pei e ona le sui usufono i lana mata se i siaki atu po o se vaaiga po o se... le mata a le Minisita lea e fai i lenei taeao, leaga o lea ua tau le iloa atu...

**FOFOGA FETALAI:** Ia malie le sui usufono mamalu ua faataga atu e le Nofoa ona o lo o afaina fofoga o le Afioga i le Minisita.

**Afioga SULAMANAIA FETAIAI TAUILIILI TUIVASA:** Ia o le system lava lea e talanoa ai leaga e pei a download loa le mea pei e faapena o le tele la

o system e lelei, a o le tulaga ua i ai ua leai ni tagata agavaa latou te aumaia ni faamatalaga i le system. E pei la o le uiga foi lena o lau faamatalaga o lea na tautino i le Matagaluega ananafi o le system e aumai i le CSL. O le uiga la o lau tala, o le a le mea na le toe poloaiina ai le CSL e aumai nisi tagata pe le o toe i ai lava tagata ia e ona le system lea na aumai. Ae o le tulaga, o le a ou oo ese mai le tulaga lena. E na o le pau lena o le tulaga sa popole i ai le sui usufono o le Vaimauga. E manaia le finagalo o le Minisita ae o le popolega a faapea o le agaga lena, lea foi na saunoa i ai le Sui Taitai o lenei Itu ia na o le aveese lava o tagata maliliu. A o le tulaga lea sa saunoa ai ananafi na tatou faalogologo uma ai lava faafetai lava ia Ale na ua alu atu i ina, manaia lava sa tetee Ale ananafi, tetee foi ma Tuuu, o le manaia ia i le faalogologo o le tetee i lenei Tulafono. I le tulaga e pei ona lagolago ai lea ua o atu i o la ua i ai le manatu ua toe salamo...

**Tofa Hon Leatinuu Wayne Soialo:** Lau Afioga i le Fofoga Fetalai...

**FOFOGA FETALAI:** Malie lau Afioga i le sui usufono mamalu se i tuu atu le avanoa... Ia tulai mai lau Afioga i le Minisita mo Faalapotopotoga a le Malo.

**Tofa Hon Leatinuu Wayne Soialo:** O se mea e fia faasao lau Afioga i le Fofoga Fetalai. Ia faafetai lava leaga lea ua aafia mai matou sa ave le fautuaga ananafi i le taimi na faamalamalama ai le tatou Tulafono. E le i i ai ni matou manatu na avatu e tetee ae na avatu o matou manatu e fesoasoani ai e faamalamalama ai i lena itu i fesili na aumai. Ia o lea la sa avatu ai nai manatu ae leai ma se isi o matou na tetee lau Afioga. O se mea lena lea e fia faasa'o i le saunoaga lea.

**FOFOGA FETALAI:** Ia lea ua manino lea tulaga... Ia leaga o lea sa taua le suafa o Ale, ia se i tulai mai lau Afioga i le sui usufono mamalu le Igoamatua.

**Tofa Ale Vena Ale (Faleata 4):** Lau Afioga i le Fofoga Fetalai, e fia faasa'o le mataupu a oe, ou te le i tetee, na ou fesili i le timeframe ma le Tulafono. Na pau lena, ae ou te le i tetee i ni Tulafono. Ia fai sa'o lau lauga i le Tulafono, manuia le tatou Fono.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai o le fesili e fia malamalama...

**FOFOGA FETALAI:** Ia malie lau Afioga i le Sui Taitai ona o lea foi sa taua le suafa o Tuuu. Tulai mai le sui usufono mo Siumu.

**Tofa Hon Tuuu Anasii Leota (Siumu):** Faafetai i lau Afioga i le Fofoga Fetalai. O lea ua taua foi lo'u tetee i le aso ananafi. E faanoanoa lava i le sui usufono mo le Vaimauga. Ia o manatu faaali lava ae sa ou tatalo lava i le po anapo. O lea la ua ou sau nei ua ou lagolago i le Tulafono. Ma lo'u faaaloalo.

**FOFOGA FETALAI:** Ia malie ia, tulai mai lau Afioga e faaauau le saunoaga.

**Afioga SULAMANAIA FETAIAI TAUILIILI TUIVASA:** Ia e leai e pei o lea ou te talanoa lava o le Pre-sitting ananafi a aumai foi faamaumauga na tele lava le tetee a le sui usufono o Faleata le la. Ae Leatinuu e le i taua lou suafa leai e mamao lava e le i taua lou suafa. Pau lava le mea lea ua faalogologo foi, e manaia foi lou tulai mai o lea ua manaia lau saunoaga i le tamaitai le augafaapae o lenei Maota, lea ua pei e atagia ai ma maua ai se manatu o le Vaimauga e i ai nisi teuteuga. Ia pei o le agaga la lenei maimau e, pe ana sao aumai uma nisi teuteuga lea e i ai lea na saunoa mai ai e pei ona i ai faifeau ma pulenuu i le tasi... A o lea foi la ua maua e i ai le isi part 2 o le mea lenei ae pei o le agaga lenei sa avatu ai.

Lau Afioga i le Fofoga Fetalai e lagolago le itumalo lenei... O le popolega i nai o tatou tagata mai fafo ona o le tulaga lenei na taua, o le afifio mai e resitala ma toe o foi lea ma toe afifio mai a o le taugata o tulaga la. E pei lea foi na taua e le sui usufono la ua tautino manino le Afioga i le Minisita e le i oo mai le tou mea lenei i totonu e pei o le popolega lenei, leaga e i ai tusi lea na aumai e faamaonia a le pulenuu aemaise foi o faifeau e faamaonia ai aemaise lava nai o tatou tagata lea e omai mai fafo.

E pei ona ou taua foi ananafi o le popolega lava ona o nai alo ma fanau lea ua sitiseni e le i fananau i nei i Samoa o fea la lona faasinomaga e le i nonofo foi ae pei o le agaga lenei. A o fanau a o tatou aiga o la e nonofo i atunuu mamao ia o lea e le o i ai totonu o le tulaga lenei lo latou faasinomaga. O le popolega, se i tulou lava lenei Maota ne i uma ane le Faiga Palota ua leai lava ma nisi i totonu o si o tatou atunuu o lo o faia le tautua e tulai mai i lenei Maota, ua pule mai fafo. Ona o le a? O lea ua tatala le tulaga e resitala mai ai latou e omai ma afifio mai e palota. O lona uiga a faapea ua tatala, o lona uiga foi la ua entitle e omai e run as a faipule. O le popole lava lenei o le sui usufono. Ia ae tatalo atu lava i le tulaga faapena ina ia malupuipua.

O lona lua o le tulaga foi lea tatou faalogologo i Amerika...

**FOFOGA FETALAI:** Toe lua minute o le sui usufono.

**Afioga SULAMANAIA FETAIAI TAUILIILI TUIVASA:** Ua tele mea na ou fia manatu ai i le tulaga foi lea o le hack o le system. E pei o le tulaga lenei po o lava lau Afioga le Minisita. O lava sau staff e tali i ituaiga mea i le puipuiga o le system. O le popolega nei uma ifo foi le faiga palota faapea e le o sao le mea lea. Ua i ai foi nisi i fafo ona lea e le o iloa po o fea le atunuu lea e aumai ai... po o ai e ona le polokalame lea ua run ai le system lea.

O le popolega lenei lau Afioga le Fofoga Fetalai, po o lava le puipuiga e vaimama ai le system ma ia aua ne i osofaia e nisi le system. O lelei mo lau Afioga i le Minisita le tulaga lea e avatu... O fautuaga... Ae pei o le agaga lenei e popoe leaga e te malele loa, o le tele ia o mea na fia talanoa ai lenei itumalo. Ae a matamata i le tulaga leaga na o le lua lava tulaga o tatou Tulafono Autu

na o le teuteuga leni o le 13 ma le 23 a o ni teuteuga ogaoga. E pei la o le agaga lena lea e tau popole ai o le tausaga fou ia Novema e tapunia ai sui faatutu... ia Oketopa next year. O lona uiga ua vave le taimi, a o le fesili la, e pei o le popolega lena, i le tatou lola aua e tatau... e pei ona ou fai atu e tatau ona vave aumai lola i sui usufono e matamata ai ma faapena ona vaavaai po o ai tagata... A o lea la e le o iloa e faapea o Iulai, Aukuso... O le taimi ae pei a avatu ma le mea mulimuli e popole lava i mea na o le system ma na mea ae le manual loa le mea. Manual loa, fono a Sulamanaia ia kolosi lata number lea e i ai. E leai se masalosalo a o le system. E pei... lau Afioga i le Minisita, lau Afioga i le Loia po o lau Afioga foi sa Faamasino. O le popolega lena o le Vaimauga. Manuia le saunoaga a le Afioga i le Tamaitai Palemia faatusa foi le system i le taavale. Ae pei o le popolega lena o le sui usufono mo Vaimauga ne i te i ua aumai le taavale fou. Tusa o le mea fou a o lea sa ou manao na o le toe repair o le taavale tuai, system tuai. A o le taavale fou, e taugata, anagata. Manuia le Fono lau Afioga le Fofoga Fetalai.

**FOFOGA FETALAI:** Malo faafetai. Malo le saunoa i lau Afioga le sui usufono mamalu. Ia faafetai foi i lou sao i le tatou Tulafono Tau Faaofi. Ia lea ua ou vaai atu ua fou mai le sa o Faleata 3. Ia, lau Afioga i le sui usufono mamalu.

**Tofa LEALAILEPULE RIMONI AIAFI (Faleata 3):** Ou te muai faatalofa i lau Afioga le Fofoga o le Fono. Malo le soifua maua ma le lagi e mama. O a foi ni fatia ua sola, e talitonu o le taeao fou leni tatou te folau ai i aso o totoo o leni Paeaiga.

E faatalofa i lau Afioga i le Tamaitai Palemia, Kapeneta aemaise le loaloa o lena itu i ona tulaga faalupe. E faatalofa atu foi i lau Afioga i le Taitai o le Itu Agai, Sui Taitai ma leni Vaega Faaupufai.

Ua paelago paia ma sa o Samoa e i latou na muai saunoa ae faatalofa ma faatulou i lau faafofogaaga Samoa, le paia i le aufaigaluega totofi a le Atua ia aemaise Le Ao Mamalu o le Malo ma le Sui Ao, ia ma le paia o Samoa i ona tulaga faalupe. E faatalofa ma faamalo le tapuai. Faafetai le tatalo mo Samoa.

Ae talitonu lau Afioga i le Fofoga o le Fono, faafetai mo le avanoa o le a tuu sao loa se manatu i le tatou Tulafono. A tatou talanoa loa i le palota, e le o se palota e na o lena Vaega po o leni Vaega. O le palota mo Samoa atoa. Aua ne i tatou vaai ua na o tatou ae tatou vaai mo le lumanai.

O le Tulafono o Faiga Palota o se Tulafono pito sili lea ona teuteu soo, teuteu pea teuteu pea, aua foi e uma loa le faiga palota fai le Komisi Suesue aumai o latou finagalo, fai le suiga, fai le suiga ona tatou taumafai lea e pupuni faafitauli sa tulai mai i le palota ua tuanai atu ona o le naunautaiga o le a faaititia faafitauli o le isi faiga palota o lumanai. Paga lea, o lea tatou te maitau e pupuni le isi faafitauli ae tupu ae ai le tele o nisi o faafitauli. O le ala lea e mafai ai ona tatou teuteu le faiga palota nei. Pei ona ou talanoa i le Tulafono i le lipoti a le Komisi Suesue na aumai, o le mea lea na tatou finagalo uma ai le tele o sui

usufono talu ai e aua le toe aumaia le Komisi Suesue, aua le toe i ai ni tagata na o i le palota. Aumai ni tagata atatamai ma tagata e le i o i ni palota e omai e fai tutoatasi o latou finagalo. O le a le mea na tatou maua? O se Lipoti na matua tetee uma i ai sui usufono o le Palemene. Tatou talanoa lea i le tuai na aumai o le Tulafono. E aumai le Tulafono o le Palota o le a fai le palota. Lea la ua tatou vaai, faafetai i le taeao lenei lea ua maua o lea sa faapea lou talitonuga pau lea o le suiga lea o le a i ai o le Tulafono lenei, a o lea la ua ou maua lea e fotuai mai nisi suiga.

O le tulaga la lenei o lea e popole tele ai lou nei mafaufau. E le o se galuega laitiiti le galuega lea o le a alo i ai le Komesina o Faiga Palota ma le Matagaluega. Ae afai e i ai nisi suiga tetele o fotuai mai e leai nisi e faia e toe fai foi e latou. O lea ua faataatia le polokalame e 18 masina, a toe i ai la ni suiga mulimuli mai e toe alu foi i le tulaga lea aua e toe savalia foi Samoa. O lona uiga, faatoa tatou vaai foi i se Tulafono i le faaiuga o le tausaga fou po o le ogatotonu ae o le a oo mai le palota. Lea sa i ai le manatu, sa tatau ona tapena faatasi mai. Saunoaga, e manino lava le saunoaga a le Afioga a le Taitai o le Malo. O le timing, timing is of the essence i le mea nei. O lea e le i aumaia ni suiga pe te i ua sui ni boundaries, sui mea e palota ai tagata. A o lea o le a resitala tagata, e i ai le taimi e toe sui ai lou mafaufau. Aua afai e lelei le option e te palota ai i itumalo i Savaii po o i inei, e mafai ona ou palota i le mea la ou te talitonu e i ai le sui ou te fia palota i ai. Ae peitai ane, lea ua aumai le Tulafono. Ia te au pei ona ou talanoa atu ananafi ana aumai le Tulafono i objective o le Tulafono e tasi lava le upu aumai e obsolete le system, e leai se mea e faigata. E le mafai e tatou ona toe sui se mea ua outdate. Ae o le mea lea e fia faamalamalama lau Afioga i le Fofoga o le Fono, e obsolete le system ae le obsolete faamaumauga. It stays the same. E le suia lou aso fanau, ma lou igoa ma le mea ou te nofo ai, lou tama ma ou matua ma mea faapena. E le suia. Pau le mea e fai, o le import mai o vaega ia e toe tuu i le system fou. E faigofie. O le mea e tatau ona tatou talanoa ai, tatou talanoa pe faafefea ona tatou galulue faatasi e achieve le mea lea, fai. O le 99% o tatou uma ia e i inei lea sa faaali finagalo ananafi e lavea ai ma lou sui usufono, tatou te mananao e kiligi le lola o le mea ua tatau ona fai ua leva le lola lea e i ai nei. Tatau ona faatino. Ae o lou talitonuga o le 80 i le 90% o le lola lea e i ai e tumau lava e tumau. O lona uiga, na tatou talanoa i le process e fesoasoani i le Matagaluega ia vave le faatinoga o le mea lea. O le faataitaiga, a alu atu Lealailepule e fai lana resitala, na o le alu atu lava pue lona ata ma fai lona lima toe sau, tick lona igoa. O tagata ia lea e toe alu atu i totonu e toe lesitala ma faamautu lana lesitala e le tatau ona tele ni suesuega seiavagana ai tagata o lea e fia o ese ma tagata fou i totonu o le lola ia lea tatou te mulimulitai lava i le tulaga lea.

O le tulaga lea e i ai, o vaega tetele lea o le tatou Tulafono e aumai... e tolu vaega... e lua vaega tetele. Muamua, o le system ua obsolete, lua o le online registration. Tasi la lea vaega o le a oo i ai se faamatalaga mulimuli ane. Ina ua fai finauga talu ai i le palota mai o tagata... o le o o tagata i Savaii e palota ai, ma o o tagata i tua e palota ai i le aso palota. Sa ou lauga ai i le Palemene lenei

ma ou tetee, tetee. O le uiga o lau tala, practicality i lou mafaufau, afai e 15,000 e palota i Savaii, e le mafai, le mafai ona lau i se aso e tasi pe lua. Aua foi e le mafai ona tatou faatonua tagata, faamalosia tagata i le aso lea. E faapena uma lava le mea na tupu i le Tulafono lenei. O lea e fai mai le Tulafono pei ona saunoa nisi o sui usufono, e le o aveesea le upu compulsory, faamalosia, faamalosia. O lona uiga, e faamalosia uma tagata Samoa po o fea e i ai. Lea la sa ou talanoa atu ai o numera ia... o le latest census a Niu Sila 2018. E 182,000 tagata Samoa la e i Niu Sila. E 56,000 tagata sa fananau iinei o ai i Niu Sila. O Ausetalia e 75,700 tagata Samoa o la e nonofo ai. Mai lea aofai e 24,000 tagata na fananau i Samoa la ua i Ausetalia. O numera ia sa aumai i le tausaga lea na tea nei. O lona uiga afai o le afa o tagata ia e mafai ona palota, tatou te tilotilo i le 130,000 tagata e ono faaopoopo i luga o le lola 120,000 lea e i ai nei. O le possibility lena, leaga e le mafai ona tatou taofia. O le saunoaga foi faapea na tatou taofia e leai se aiatatau mai lava i le amataga na taofia i faiga palota nei. E tatala mai i le amataga seia oo mai i le aso. Pe e te nofo i Samoa pe e te nofo i fea o le lalolagi, e tatala le avanoa e te sau e te resitala ma palota. Pau le eseesea lea ua i ai nei, lea ua fai mai online. O le vaega la lea lea sa tatala foi e le Tulafono talu ai. A o le tatalaga lea na i ai, o tagata la e aoga i fafo, faigaluega e mafai ona online na omai lea i le taimi e omai fai ai i Samoa.

O le eseesea o le Tulafono muamua ma le Tulafono lea ua i ai suiga lea ua i ai, o le Tulafono muamua, e mafai ona e resitala ae le tuua lou igoa i le lola palota seiavagana ua e oo mai i Samoa, complete faauma lea o lau resitala ona faatoa tuu lea o lou igoa i le lola. O le suiga lea ua aumai i, e le gata e mafai ona e resitala mai online ae mafai ona faamau loa lou igoa i le lola. O le mea lena lea ou te talanoa atu ai e tataua ona toe fetuunai. E le fetuunai. Aua a matua o ifo nei e resitala, ae mulimuli ane e tataua ona omai iinei. E tataua ona omai iinei e resitala ma faauma lau resitala, e toe alu e toe sau foi i le taimi e te palota ai. O lona uiga, a faaauau lava le mea lea o le resitala online, e leai se mea o i ai ae a omai... ma aua le faamaua le igoa se i maea ona oo mai e pue lau ata ma fai ou lima ma faamaonia po o fea e te palota ai nei. Aua o le fesili tele lea e saunoa ai le tele o sui usufono, o fea le itumalo? O lea e feteenai le Tulafono, o le Tulafono o le residential iinei i faiga palota six months prior... po o le six months talu e le i faia le palota o le mea lea e te nofo ai. O i ina e faaoga e te resitala ai i le palota. O fea la lea e tusi ai le palota a le tagata lea e sau?

O lavelave la ia lea ou te talanoa atu ai tilotilo pe faapefea ona fai. O lau ia fesoasoani i le itumalo. O le a le mea na fai e le Malo talu ai ina ua naunau e faasoo le tui? Lua aso malolo, lua aso malolo ae fai. O le a le mea na faatino i le faiga o le faitauga aofai ina ia maua le aofai o le numera? Lima sefulu tala, lea na toatele, lea na toaititi a... matua tele le suiga o le faitauga aofai. Afai e faatino le mea lea, faaoga ai le tupe lea o le miliona, i lou lea talitonuga. Tai \$100 tala i le tagata. Sau e fai lau resitala avatu lau \$100 vave le galuega. A tai \$100 e uma a taeao na fai isi itumalo... E le sese le tala. Afai foi e tele se tala a matou Vaimauga ma Faleata, Vaimauga ma Faleata e 33% o le atunuu e palota iinei i le taulaga ae 67% Samoa atoa. A o matou iinei le taulaga e toatele,

e tele la le suiga atoa o mafaufauga mo le faiga palota pe afai e uma le galuega tele lea e fai ae toe sau nisi suiga ia e fotuai mai toe sui atoa boundaries sui atoa ma isi mea. Ia, talofa e! Tailo i ai, o mea e tatau ona tagai i ai le faigamalo.

O le... i lou talitonuga, o le mea lea e faamamafa i le saunoaga a le Taitai o le Malo ma tatou uma lava, o lea e saunoa mai le Afioga i le Minisita ma lana Matagaluega, e mafai, e mafai ona faatino. A o lea e talanoa atu nisi o tatou, e faigata, ua leva ona tatou i ai i lenei mea ma le faiga o nei mea. O Samoa, manatua foi le mea lea na pisa ai nei i tui, i faiga tui, na omai foi nisi tagata popoto mai fafo, fai mai e taatia lena mea o le o i tua, ma la ua fai taavale e omai i totonu. O le a le mea na tupu? Matua tele le faaletonu. O tagata Samoa ia ma Polenisia latou te outreaching. E te alu i ai, a e le alu i ai e le taitai... Pe nofo i talaane o lou fale a e le alu i ai... Lea ou te fai atu leaga o au... o le isi palota... taimi a o ma tauva ma lou uso le Igoamatua e afe tagata na ou resitala. Ioe, e moni. Ae ana ou le alu e aumai e nofonono lava latou e le omai, toe fai lea o le palota ou alu foi toe aumai. Faafetai o lea ua i ai le Tulafono lea o le compulsory voting. Aua e fiu lava e fai, e 30%, toetititi lava 30% tagata e le i palota talu ai, aua foi o lea e faatalitali mai. A o le mea e tatau ona fai, e tilotilo tatou i le most practical way, le mea e work mo tatou tagata, aua tatou te faataitai fua i isi atunuu e ese lava latou ese foi tatou.

Ia, e talitonu lau Afioga i le Fofoga o le Fono o nai vaega na o lea ou te... o lea ua saunoa, manaia le mea lea na saunoa i ai le Minisita o Galuega. Ina ua aumai le system a le SNBH lea tatou te pepese ai nei, o le taua ia leaga o le manatu autu lava na aumai ai e le Malo le system lea ina ia connect systems uma a Matagaluega a le Malo e faigofie ai galuega. Na faaaoga la i le Palota o le 2016. Ioe. O le taimi lena e te alu foi e tofogi le Pepa Fanau o le tagata ae fai ifo le Palota i le taimi lea, matou te oatu o lea ua i ai le system i tai i i la ua i ai uma lava ia le lisi o asofanau, faafetai, e tatau foi ona iai ii ia latou ma le lisi o Matai ma le tau toe o i i e avatu Pepa Matai. Ia, a le faafaigofieina le faiga o le process lea tatou te faia e fai ai le tatou mataupu lenei, ia o le a matuai faigata lava ma iu ai ina le tau lau o le faamoemoe. A o lea ua tatou maunoinoa pei ona talanoa atu, e le aveesea fua faamaumauga ia, e le obsolete ni faamaumauga. Pe e te suia foi le taavale, e leai lava se taavale ua sau e leai ni moli, Ioe, e upgrade a le taavale ae tumau a basics, tumau lava moli, salutimu, faata ma mea faapena. E pei foi lava o tatou.

O le tatalo lea i lau Afioga i le Minisita e tatau ona fai Regulations pe a tusa ai ma lou finagalo, e faatino ai lau galuega lea e fai, ina ia faafaigofie mo tatou uma le faiga o le resitala. A o atu nei au ma lou toalua ma lau fanau ma tagata uma lea ou te talitonu e palota iinei i lou Itumalo ia na o le o atu a o i totonu, pue ata ma fai fingerprint toe omai i fafo. Ia a o le mea lea o le toe o atu foi toe faamasino, fai ai lava, fai ai lava toe fai mai e sainsi mai le Faifeau pe sainsi mai le Pulenuu.

**Afioga Hon Toelupe Maoiautele Poumulinuku Onesemo (Minisita mo Fesootaiga ma Faamatalaga Tekonolosi):** Lau Afioga i le Fofoga Fetalai...

**Tofa LEALAILEPULE RIMONI AIAFI:** Ou te talitonu e faigata, e faigata lava le tulaga lea lau Afioga.

Ae lau Afioga i le Fofoga o le Fono ua lava foi lau lauga, faafetai...

**FOFOGA FETALAI:** Malie lau Afioga, ia se i tulai mai lau Afioga i le Minisita mo Fesoootaiga.

**Afioga Hon Toelupe Maoiautele Poumulinuku Onesemo:** E leai se agaga e faalavelave i le saunoaga a le Afioga i le sui usufono mamalu. Ia, ua faalogologo foi ma le totoa i le siufofoga matagofie ma logolelei o le Afioga i le sui usufono ua leva tatou te le i toe mafuta, malo faafetai.

Atonu e i ai si mea itiiti lea leaga o lea sa taua le SNBH, lea foi sa saunoa i le tulaga lea. E pei o le isi lea tulaga o lo o i ai tapenaga mo le system fou a le tatou Faiga Palota, ona o lea foi ua toe faataatitia nai vaega e toe atiae ai le tatou SNBH ina ia tietie ai i luga le tatou system fou, tulou le Maota. E pei na pau lena o le fesoasoani atu.

Ia ma le isi lava lea vaega lau Afioga, ona o lea e maitau mai faapea o... leai o le resitala lea e i ai nei, o le tulaga lea e taumafai atu o le Tulafono sa fai i le 2019 lau Afioga i le Fofoga Fetalai. 2019 e tatau ona e palota i le mea e te afio ma e papaaa ai, peitai i lena taimi i le Tulafono e le mafai e le Komesina o Faiga Palota ona aveesea ni suafa mai luga o le Lola. O le ala lea o le teuteuga lea i le Vaega 23 ina ia mafai ona faatino lea vaega o le Tulafono ua leva ona i ai. E pei na o le pau lena lau Afioga e fesoasoani atu ai, o lea e ala ai ona tapena le tulaga e le Faigamalo. Aua a tuu lava i le mea sao o lea e solitulafono uma lava, lea lava e molimau, e nofo i Upolu ae palota i Savaii, seiavagana la i le Tulafono fou lea ua i ai, seiavagana ua e matai. Ma le agaga faaaloalo lau Afioga.

**FOFOGA FETALAI:** Ia, ee i tulai mai lau Afioga.

**Tofa LEALAILEPULE RIMONI AIAFI:** O le mea la lea na ou musu ai e... Faafetai lava mo le system lea o lea tatou te malamalama ai. A o le toe saunoaga mulimuli lea faapea o lea e solitulafono, lau Afioga i le Fofoga o le Fono, aveese na tala e le manaia, e le sa'o, e leai se tulaga faapena o i ai. O le mea lena na i ai, o le palota lea na uma atu nei lea na faamamafa lava le residential, le mea e nofo ai le tagata. O tagata ia talu ai, o le mea lena na ala ai na pisa talu ai i le Palota na ave i ai le tatalo a matou, faamolemole... tai pei lava o le tatalo lea a Tuuu ananafi, e mafai ona faatino pea ae se i faaaoga i le isi Palota ona o lo o i ai lava tagata o lo o i luga o le Lola a Salafai ma tua e le mafai ona toe aveese mai.

O le ala lea ona o le lē lava o le taimi. Ae o le Tulafono ia, o le tulaga lena i ai, e pei ona talanoa atu e leai ni Tulafono e tatou te faia toe soli e tatou. Leai, e le o le agaga lena. A i ai foi ni sese o Tulafono, ni mea e tatau o Tulafono ua outdated, o mea na a outou e fai aumai e fai. Ae pei ua maitau lava i saunoaga a le sui usufono lea i le tele o taimi e saunoa ai, e pei e tu fai mai, o Tulafono a outou na fai, o le Tulafono sese na fai i le taimi o outou.



**Afioga Hon Toelupe Maoiautele Poumulinuku Onesemo:** Lau Afioga i le Fofoga Fetalai...

**FOFOGA FETALAI:** Se i tulai mai lau Afioga i le Minisita mo Fesootaiga.

**Afioga Hon Toelupe Maoiautele Poumulinuku Onesemo:** E avatu vaimalu i puega e le o le agaga lena o le... a o le tulaga foi lea e pei e lafo mai le uluulu i lenei itu pei o le agaga lena. Tatou galulue faatasi, ia toe faafoi mai se tala ua solitulafono ia ae le i mulimulia ala o le Tulafono pe afai e tonu lea ma le agaga faaloalo.

**Tofa LEALAILEPULE RIMONI AIAFI:** Faafetai lava i lau Afioga i le Fofoga o le Fono. Leai o le uiga o le tala, o lea e afio le Taitai o le Malo ma le Afioga i le Minisita e ou le Tulafono, e leai lava ma se gagana. O Lealailepule pe Itu Agai pe Itu a le Malo e lauga lava ia i lona talitonuga e lauga sao lava i le mea e tatau ona i ai. E faamalulu atu pe afai e... Ae o le tulaga lena e i ai aua tatou te tau le pua ma lafo, e leai o lea e faafofoga mai i le lauga e alu sao lava le lauga i le mea e tatau ona fesoasoani, galulue i le mea e tatau ona fai. Ae aua tatou te toe ola tautuuai e leai se tatou mea e maua ai.

Lau Afioga i le Fofoga o le Fono, e momoli atu le faafetai tele mo lou avanoa, ia manuia lou tulai mai. Faamagalalo foi se sese i na taimi ma futia ua tuanai atu, ae tatou agai i luma mo se lumanai mo Samoa ma le Palemene. Manuia le fonotaga, faafetai.

**FOFOGA FETALAI:** Malo faafetai, malo saunoa i lau Afioga i le sui usufono mamalu, ia o lo o sologa manuia lava le tatou mafutaga e leai lava se mea o faaletonu vagana lava se lagona i lau Afioga o faaletonu, ia a o lea lava e sologa lelei lava mea uma. Ia ae malo lava mo le saunoaga.

Ia tulai mai lau Afioga i le sui usufono mamalu mo Faasaleleaga 5, lau Afioga Satuala.

**Afioga PESETA VAIFOU TEVAGAENA (Faasaleleaga 5):** E momoli atu le faafetai i lau Afioga i le Fofoga Fetalai ua maua foi le avanoa o lenei Itumalo. E faatalofa atu foi i lau Afioga i le Tamaitai Palemia ma lau Afioga i le Sui Palemia faapea foi le afifio o a outou Afioga i le Kapeneta, le mamalu foi o a outou Afioga i Minisita Lagolago, le Afioga foi i le Taitai ma lenei itu o le malu.

E faatalofa atu foi i Ofisa Sili o Pulega o Matagaluega o si o tatou Malo ia faapea foi le lua vaa seelua ma le mamalu foi o le aufaigaluega a le tatou Ofisa o le Fono Aoao Faitulafono.

Lau Afioga i le Fofoga Fetalai e le tele foi se manatu o lenei Itumalo o lea ua tele ina folasia i le Maota nisi o finagalo sa tau molimoli atu. Ae na o ni nai vaega ou te fia avatua ona o le tele foi o nei suiga o mea sa faatino foi i lea foi Faiga Palota ua mavae atu ma e i ai foi faafitauli sa molimauina. O lea la ua aumai nei le Tulafono lea ua aumai nei ia o lea ua matau atu, atonu o taumafai foi lau Afioga i le Minisita ma le Matagaluega e faatino se isi suiga ma le tatou talitonuina o se suiga e tulaga i se tulaga lelei po o se tulaga faalelelei. Aua e le

mafai lava ona tatou iloa se tulaga lelei po o se tulaga faalelelei seiloga ua faatino.

O lea la ua fola i le Maota le Tulafono. Ia ae i vaega lava ia e pei ona faalauiloa mai, e ao ona toe lesitala uma le Lola, ia e tasi la lea vaega e i ai le popo'e o le taofi o lou sui usufono ona e le o se galuega faigofie. E ala la ona ou avatu le vaega lenei aua foi o lea sa faapea foi ona faia i le Paeaiga na mavae atu, e le faigofie ae le taugofie i sui usufono. E ala ona ou taua sui usufono uma o le Maota i le Paeaiga i ona tua atu aua foi o lea ua faatino e le Matagaluega le Tulafono ae o le faalavelave e faamoemoe lava i sui usufono e latou te faatinoina le Tulafono. O lea lava ua tatou vaavaai i le tele o nai tagata o tatou Itumalo, e fiu lava le Pulenuu ma le toatele foi o le Matagaluega e faasalalau ma amiami i taimi e omai ai e resitala e le taitai lava omai. E faamoemoe lava le isi tagata se i alu atu le Tofi o le Itumalo e aumai ia, ioe, po o ai lava e alu atu ia o lea lava ua tatou masani foi i nei mea o Palota ma mea e tutupu i tatou Itumalo e faamoemoe lava se i alu atu le Tofi e aumai ia e fai le resitala.

E pei o faafitauli la na, a o le isi faafitauli e maimau pe ana faapea la e lava le taimi e faatino ai e le Matagaluega, ia aua e le o lava se aufaigaluega a le tatou Matagaluega. O le mea moni lena e tataua lava ona o le Matagaluega e aumai uma tagata o Itumalo e resitala ae aua le faamoemoe i sui usufono ma nuu i tua. E pei a ona ou fai atu o faafitauli na lea sa tutupu.

O le faafitauli lona lua aemaise lava si o matou motu i Salafai, o le faafitauli lea ina ua pasia foi le Tulafono lea a le tatou Matagaluega, o ē lava e i Salafai e o uma lava i Salafai e palota ai. Ia aua e fai lau tala o le tele o nai tagata mai le matou Itumalo e nonofo mamao, o Aleipata ma nai nuu mamao i tua, ia e faamoemoe uma lava i nai pasese. E le faigofie, e le taugofie. A le alu le sui usufono e aumai ma taumolimoli i Savaii e fai le palota, o le totogi o le vaa, totogi le pasi. O le uma o le Palota i Savaii toe totogi le vaa, totogi le pasi e aumai ai inei toe totogi le taavale e momoli ai i le aiga, e le taugofie nei mea, e le taugofie, leaga ua uma ona faatino ma ua uma foi ona tatou molimaui. Ioe. Aua ou te talitonu o nei mea tatou te faia o lea tatou te solia le Tulafono. Ioe. Aua foi a le alu le sui usufono e aumai lona Itumalo e ave e faatino le faamoemoe, o le tulaga lena lea ou te fai atu...

**Tofa Hon Leatinuu Wayne Soialo:** Lau Afioa i le Fofoga Fetalai...

**FOFOGA FETALAI:** Se i tuu atu le avanoa i le Minisita mo Faalapotopotoga a le Malo.

**Tofa Hon Leatinuu Wayne Soialo:** E lelei lava le fai ma faamanatu pea i le sui usufono, ua uma ona sui le Tulafono lena e le toe o tagata o lo o alaala i inei i Upolu e fai a latou palota i Savaii i Puleono. O lea lava ua mafai lava ona palota latou i inei, ne i te i ua faapea o le a toe lau atu foi i Savaii ia ae ou te talitonu o lea ua uma ona silafia uma e sui usufono o Savaii, leai o lea lava ua faatino inei, faatino i Savaii i latou o lo o alaala i Savaii ne i te i ua faalogologo mai le Itumalo faapea ua toe sui atu foi. Ma le faaaloalo lava.

**Tofa Hon Olo Fiti Afoa Vaai:** Lau Afioga...

**FOFOGA FETALAI:** Mo le faasaoina o lou taimi, se i tulai mai le Afioga i le Minisita o Galuega Tetele.

**Tofa Hon Olo Fiti Afoa Vaai:** Faafetai lava i lau Afioga i le Fofoga Fetalai. Peseta, o lau lauga tonu lava lena na fai mai a o ou nofo mai i ina a o e nofo i tua ifo o le sa Palemia, le Taitai o le Itu Agai. E te le i taliā le mea sa ou tatalo mai ai faapena. O le a e toe tatalo la ia ai? E le o le mea lena na fai atu ai i le taimi lena tou te silasila lelei i le pito lena. Ae sou mafaufau po o le a lau fautuaga e ave i le Minisita i lau talosaga lena.

**FOFOGA FETALAI:** Tulai mai lau Afioga i le sui usufono mamalu e faaauau le saunoaga.

**Afioga PESETA VAIFOU TEVAGAENA:** Lau Afioga, o lou fiafia ia ae tali mai le toalua lea, Minisita ia e toalua, ioe. Ae lau Afioga i le Fofoga Fetalai, o lea ou te talanoa i mea sa tutupu, pei lava o le Tulafono lea e taumafai i ai le Afioga i le Komesina. E pei lava ona ou fai atu o se Tulafono lelei, ioe. Ou te le faapea ou te teteē ona o nisi tulaga. Ae o lea e le i oo atu ia mafuaaga e ala ai ona ou tete'e i isi vaega ona o mea sa tutupu o lea ou te taumafai e aumai. E faamalie atu lau Afioga i le Minisita, o lea ua ou iloa o lea o le a palota mai foi Savaii ia iinei. Ae pei o mea sa tutupu lea ou te taumafai e faatino ona o le Tulafono lea ua aumai.

Oo mai loa lea o se manatu lau Afioga i le tulaga lea o le palota lea online mai fafo, o se matua faafitauli lena o le a feagai ma le Maota lenei ma le atunuu lenei. O le faafitauli sili ona ogaoga le mea lenei, o lea ua mautu Faalapotopotoga i Niu Sila, o Faalapotopotoga i Amerika o Ausetalia ma le tele o atunuu. Ua fai vaega foi Faalapotopotoga nei, a o le mea la lea o le a faigata nei i tulaga la a oo i ai afai nei o lea o le a resitala online mai, ua uma nei la ona faataunuu nei vaega uma a o lea la o le a toe telefoni mai nei i le sui usufono e totogi mai le pasese e sau e fai le palota iinei, ia pe totogi mai e nei Faalapotopotoga a o lea ua faapea mai i lena vaega, ioe, i le tou vaega, totogi se vaalele e aumai ai matou uma. Ia pe faapea foi o le matou itu silasila i ai o le tele o solitulafono o lea o le a tou faia, ona o le tapenaga fua o lenei Tulafono. O le a le mea lea ua tupu i le lalolagi i le taimi lenei?

**Tofa Hon Leatinuu Wayne Soialo:** Lau Afioga i le Fofoga Fetalai...

**FOFOGA FETALAI:** Malie lau Afioga i le sui usufono mamalu leaga o lea ua tulai mai le Minisita o Vaalele, se i tulai mai lau Afioga i le Minisita.

**Tofa Hon Leatinuu Wayne Soialo:** E lelei lava se i faasao atu pea o saunoaga, o mafauauga ia o le sui usufono, o ona mafauauga ia o mea ia o le a tutupu aepeitai e le tupu le mafauauga lea. A faapea foi ua fefefe ia i latou o

lo o i atunuu i fafo, toaga e faamaopoopo i latou i fafo atonu e fesoasoani mai i lou faamoemoe pe a oo i le taimi o le palota.

Ae o le tulaga foi i le vaalele, manaia. A mafai ona e faatonutonuua latou o le a charter se vaalele e omai ai ma tulaga faapena ona faafesootai mai lea o tatou kamupani vaalele e mafai ona fesoasoani i le faagaioiina o charters ia pe a faapea e faataunuina. Faafetai lava.

**FOFOGA FETALAI:** Ia tulai mai lau Afioga i le sui usufono mamalu e faaauau mai lau saunoaga.

**Afioga PESETA VAIFOU TEVAGAENA:** Lau Afioga i le Fofoga Fetalai o le mea tonu lava lena lea e fai atu ai le itu lea e aumai le vaalele, ioe. Afai ua outou fuafua i le tulaga lea ia aumai ia tagata ma le mamalu o si o tatou atunuu o lo o i fafo ia aumai le tatou vaalele. O le mea sili ona faigata i le mea lea aua ne i tupu le mea le na tupu i Salelologa i le uafu i le palota lea ua maea ua o atu nei tagata ua leai se vaa, taunuu atu i Salelologa ua leai ni pasi. O le a le mea na tupu? E tele tagata o lo'u Itumalo e le i palota, ua le lava le taimi. O le mea foi lena o le a oo i Niu Sila ma Ausetalia leai se vaalele. E o atu e pue se vaalele...

**Tofa Hon Leatinuu Wayne Soialo:** Lau Afioga i le Fofoga Fetalai...

**FOFOGA FETALAI:** Malie lau Afioga i le sui usufono mamalu se i tulai mai lau Afioga i le Minisita o Faalapotopotoga a le Malo.

**Tofa Hon Leatinuu Wayne Soialo:** O lea lava e saunoa mai le sui usufono mamalu i le Tulafono tuai, Tulafono lea sa latou faia, lea ua le toe faia i le taimi lenei, e le toe oo se tulaga faapea ia i latou o loo palota i Savaii ona o lea o le a palota lava iinei, ina ia malamalama i ai ne i faapea le atunuu ai o le a toe fai le mea sese lea sa fai muamua. Ma le faaaloalo lava lau Afioga i le Fofoga Fetalai.

**FOFOGA FETALAI:** Lau Afioga i le sui usufono mamalu e le o se faiga palota o le faafouina o le tatou system lea e talanoaina i le Tulafono. Tulai mai lau Afioga.

**Afioga PESETA VAIFOU TEVAGAENA:** E pei o vaega ia lau Afioga i le Fofoga Fetalai o le popolega lena o lou sui usufono i mea o le a tutupu pe afai o le a taunuu le tulaga lea o le online mai o le resitala o tagata palota. E pau lava lena o le vaega e tetee ai lou sui usufono ona o le tulaga lea. E le gata i lea o lea e lava le taimi o le tapenaga o le Tulafono...

**Susuga Hon Laauli Leuatea Polataivao Fosi:** Lau Afioga i le Fofoga Fetalai...

**FOFOGA FETALAI:** Malie le sui usufono mamalu se i tulai mai le faauilavea a le Afioga i le Minisita mo Faatoaga ma Faiga Faiva.

**Susuga Hon Laauli Leuatea Polataivao Fosi:** Sa le faalavelave lava ae ona ua tele sui usufono ua taua le online. Se malilie o le online ua leva ona pasi na pasi i le tatou Tulafono lea na pasi i le 2019 e le fou la le online, e le o se mea fou nei faatoa aumai le online. O lona faalauteleina o lea ua tatou agai i ai, ae pei ua ou vaai atu ua e fefe Peseta. Se aua e te popole e pule le Atua i le tatou filifiliga. Ua alu le taeao o taumafai atu le Minisita taumafai atu le Palemia, omai. E faapefea ona fai le system? E faapefea na fai? Ua le aoga ua tu, ua tuai. Tatou onosai po o le a le ituaiga system tatou te o i ai, e pule le Atua, afai lava o lou taimi mulimuli lenei, talia, ae tatou tapena lelei mo le lumanai. Ae pei ua ou vaai atu pei o se mea mamafatu ua tatou lafo i le atunuu, talofa e, tou te omai e resitala tou te omai e palota a o lea e tapena atu le isi vaega o le Tulafono e pigi mai lava i o le mea. O le a tauau ina sese ai mafaufau o tagata o lea e tau faasolosolo atu aiaiga o le Tulafono lea. Malilie sui usufono, e lua a mea ia na avatu, o le faalauteleina o le online ma le fai o le system fou. E faapefea ona fai? E tataua ona amata taeao. O le a le tatou Tulafono lea e tau faasaosao atu nei? E ta lava le taimi o le Palota o lea e sui. We don't want that to happen again. E uma tatou te taunuu toetiiti vaveao o le palota o sui, sui, sui. Faafetai o lona ua e ioe i le mea sese na e palota i ai e o Savaii e palota i Savaii. A lea ua e lagona le tiga o le mea? Lea ua toe sui atu nei taofi uma palota Savaii i Savaii, palota tatou iinei aua le toe feoi. Ma lou agaga faaloalo.

**Tofa Lealailepule Rimoni Aiafi:** Lau Afioga i le Fofoga Fetalai...

**FOFOGA FETALAI:** Ia e agai i fea lau faauilavea?

**Tofa Lealailepule Rimoni Aiafi:** Ia e agai i i le Afioga ia Pese. Pese, o le online, e moni le Afioga i le Minisita ua leva na fai i le tatou taimi, a o suiga ia e aumai e sui ai le online e matua ogaoga lava. A tatou le faaeteete la i ai ma... O le mea sa i ai a e resitala online e le tuua lou igoa se i e sau i inei i Samoa, lea la ua sui ai nei i i. Ia faamolemole Pese ia e lauga sao lava i le mea lona i le faigata lea tatou te talanoa atu ai. Faafetai lava.

**Afioga Hon Valasi Luapitofanua Toogamaga Tafito Selesele (Minisita mo le Soifua Maloloina):** Lau Afioga i le Fofoga Fetalai...

**FOFOGA FETALAI:** Ia se i tulai mai lau Afioga... mo le faasaoina, se i tulai mai lau Afioga i le Minisita mo le Soifua Maloloina .

**Afioga Hon Valasi Luapitofanua Toogamaga Tafito Selesele:** Ua maitauina talofa i le sui usufono mo Faasaleleaga 5 e foliga mai e le malamalama ua matua fai lava le aoga e le Afioga i le sui usufono mamalu lea faatoa sau i le Maota. Ua mafua ona tupu mea ia i le sui usufono mo Faasaleleaga 5, o ona mafaufauga leaga aua afai lava e lagona e le tagata e leaga

ana mea na fai ia lea la e talau mai ae le o le Tulafono lena. Malie ia le sui usufono mamalu se i fai e le Malo lenei se mea e te ofo ai ma faigofie. O le Tulafono tonu lava lena na tou faia na faiaina ai le HRPP. Ia a o lea la o le a fai e le FAST ia le mea sili ma mea faigofie. Ia manuia le Fono lau Afioga leaga ua lagalaga manatu o le Maota.

**FOFOGA FETALAI:** Ia tulai mai lau Afioga i le sui usufono mamalu e le o toe umi sou taimi.

**Afioga PESETA VAIFOU TEVAGAENA:** Lau Afioga i le Fofoga Fetalai sou tali atu lava i le Minisita o Faatoaga. Lau Afioga i le Minisita na o le Atua lava ou te fefe ai, ioe. Bring it on, ioe. Po o ai lava po o ai e te manao e sau ma te pigi, I am ready I have no fear. O lea ua ou fai atu. A o lau Afioga i le Minisita o le Soifua Maloloina, na pau lava le mea ua e sasi ai o lou siiina fua o le totogi o le faamamaina o toto o tagata. Ioe. Ua taugata tele na mea lea foi la a toe fai atu nei mea na o taugata, taugata, taugata.

**Afioga Hon Valasi Luapitofanua Toogamaga Tafito Selesele:** Lau Afioga i le Fofoga Fetalai...

**FOFOGA FETALAI:** Leaga o lea ua e taua ia tiute o le Minisita. Se i tulai mai lau Afioga i le Minisita.

**Afioga Hon Valasi Luapitofanua Toogamaga Tafito Selesele:** E le tuumamaina saunoaga a le sui usufono. Na pau le mea e tatalo i ai ia aua ne i maua e ia le masini lea e... ae fai ma e alu e te vaavaai ma e silasila i le Maota faamamatoto ne i meaane ua e pese pese i le taugata ae te i ua e oo i ai i le tulaga lea. E pau lau fautuaga e le o se mea na faia e le Minisita ma le Matagaluega po o le NKF. Leai o mea ua uma ona fautuaina e le tatou Komiti foi lea po o le vaega foi lea o le Revenue Board, a o lo o taugofie mamao Samoa, ae alu i Niu Sila ua uma ona ou faamama ae leaga e le o le Tulafono lena, ne i meaane ua mamao ese le ta mataupu ae le o le Tulafono. E faigofie ia o le Tulafono ae ioe ia i le Tulafono, soia ia e te faalogologo ia Leala lena faatoa sau ae ia manuia le Fono.

**Tofa Lealailepule Rimoni Aiafi:** Lau Afioga i le Fofoga o le Fono.

**FOFOGA FETALAI:** Ia se i tulai mai.

**Tofa Lealailepule Rimoni Aiafi:** Ia leaga o lea ua tau faalua, na tau muamua ou te le i tali i ai lau Afioga ae lea ua toe tau faalua e pei o le a le malie foi. Ae ui i lea ou te faamagalo i le sui usufono. Manatua o lea na saunoa mai faatoa sau... E leai o Leala o le a 20 tausaga talu ona i i. Ma le faaaloalo lava.

**FOFOGA FETALAI:** Tulai mai lau Afioga i le Minisita.

**Susuga Hon Laauli Leuatea Polataivao Fosi:** Ioe lau Afioga i le Fofoga Fetalai, o lea ua saunoa le sui usufono bring it on. O le tasi lenei sui usufono na ia faalalafia Pulenuu. Pese e ala na ou fai atu leaga o lea ou te fai atu po o le a le mea ua e fefe ai i lenei taimi, a o oe le tagata e tele au idea e te sao ai. A la e alaala mai luga Vui Seinafolava a le FAST ua fiu e sue le Pulenuu ua e alu faalafi le Pulenuu. Ia o le tali lena. O lea e tau faasaosao atu nei le tatou Tulafono ia aua ne i toe aafia i latou e certify ina tagata e o i le Palota. O le faamalamalamaga lena, o lena lava e te saunoa mai, ia, se i tatou iloilo pe a oo i le 2026.

**FOFOGA FETALAI:** Ia malie lau Afioga i le sui usufono mamalu ia faauma mai toe tasi le minute.

**Afioga PESETA VAIFOU TEVAGAENA:** Lau Afioga i le Fofoga Fetalai, ia ua uma foi se manatu o lenei Itumalo. O le agaga fiafia ma le agaga faafetai o lea e avatu lava se manatu o lo'u nei sui usufono e uiga i le tatou Tulafono a o le tuualalo lau Afioga i le Minisita pei ua fai si vavevave, ua fai si vavevave. O Tulafono faapenei e tataua ona talanoa i le Paeaiga lenei ae faatino i le isi Paeaiga. E faapena se silasila i ai a se Matagaluega leaga e le laitiiti le suiga lenei o se suiga tele tele.

O lea lava e tatalo atu ai lau Afioga i le Minisita ma le Matagaluega toe silasila, aua e leai lava se Paeaiga e le faia ai ni fesuaiga aua foi faatoa tatou iloa mea tutupu i lea taimi ma lea taimi. A o le agaga lena lea e avatu ai le talosaga atonu e i ai nisi faafitauli tatou te le iloa e manaia pe a tuufaatasi se taimi e tasi ia lava se taimi e fai ai ona ua vave tele mo lenei Paeaiga ae pei o le agaga lena ua avatu ai sau lava tuualalo ou te matua ou teena lava le tulaga lea o le online mai o palota mai fafo lau Afioga.

E momoli atu lau faafetai i lau Afioga i le Fofoga Fetalai. Manuia tele le Fono ma le faaaloalo lava.

**FOFOGA FETALAI:** Malo faafetai. Malo mo le sao foi o lau Afioga i le tatou Tulafono Tau Faaofi. Ia tulai mai le sui usufono mo Falelatai ma Samatau.

**Afioga LUPEMATASILA GALUMALEMANA TOLOGATA TOGIA TILE LEI'A (Falelatai ma Samatau):** Lau Afioga i le Fofoga Fetalai, e manatu o lea ua maea ona e sisi le atumua i le taeao ua sola o le viiga ma le faafetai i le Atua. Ua maea foi ona e tapa tulia i le tata e taitoaluaina lenei Palemene i le Agaga o le Atua a o feagai ai le tatou Palemene ma felafolafoaiga o lenei foi Tulafono taua.

O paia o lenei Maota faapea foi le faafogafoga tapuai a le tatou atunuu aemaise o le aufai tatalo e manatu o le a faatalolo, ae ou te faatalofa atu i si ou Itumalo o Falelatai ma Samatau i le paia o le Aiga Tauaana ma la outou Tama faapea le Falefa o Usoalii, Falelatai ma le mamalu ia te oe Leulumoega. Faamalo le tapuai faafetai tatalo. E manatu o lo o feagai lo tatou Itumalo i nisi o pitonuu ma tatou galuega tetele o lo o faagasolo i lenei taimi o le fausiaina o faleaoga faapea foi le suaina o tatou auala galue malo le galulue.

Ou te fia faatalofa atu foi i si ou tina matua ia Leaia Tuisau'a Etuale ma le fanau malaga mai Niu Sila ma Ausetalia. Faafetai tatalo, faafetai tapuai.

Ona ou oo mai lea i le Tulafono Tau Faaofi e pei ona i lumamea nei i le Palemene. I lenei Itumalo, e lagolagoina e lenei Itumalo le mafuaaga ma le sini autu o lenei Tulafono Tau Faaofi o Faiga Palota 2024 i ona mafuaaga nei. E pei ona maua i le folasaga a le Komesina ma le Ofisa e faapea foi le saunoaga a le Minisita ma le Afioga i le Tamaitai Palemia, ua obsolete le system o lo o i ai i lenei taimi. O lona uiga e le mafai ona tatou faia se isi mea ua tataua ona sui, ae o nai popolega o lenei Itumalo e tulai mai i nei suiga, e ao lava ona tuuina atu i lau Afioga i le Minisita faapea foi le Komesina ma le Ofisa o Faiga Palota. O le matau a lenei Itumalo o Paeaiga uma lava e tulai mai ai suiga i nei Tulafono e pei foi ona maua i saunoaga a nisi o sui usufono e oo lava i le taimi o le a uma le Paeaiga o fai a suiga. O le fesili aisea? O le tali i lau tau vaavaai i ai o le taumafai lava ina ia tulai mai le Tulafono lenei i sona tulaga lelei ina ia lelei ona faafoe faiga palota a le atunuu. O le vaega foi lea e ala ai ona lagolago e lenei Itumalo le suiga lea, pe afai o se suiga e siitia ai le tulaga lelei o le faatinoina o tulaga tau palota i totonu o le tatou atunuu. Ua maua i nisi o saunoaga e pei foi ona i ai i le tausaga ua mavae le naunautaiga o le Malo foi sa i ai i lona vaitau, ina ia matua tafieseava lava le faafitauli lea o le palota e ni tagata ese e le o ni tagata o se itumalo le sui usufono o le itumalo. O lea foi la sa agai uma ai tagata e palota i le itumalo o lo o palota ai ma le faamoemoe, o i ina e mafai ona maua ai ma silasila i ai le itumalo e le o ni tagata o le itumalo tagata ia e omai e palota. Peitai, e faatino atu lona faamoemoega taua, ua le o gatasi le futia ma le umele e pei ona saunoa nisi o sui usufono, ua leai ni vaa e afifio ai le mamalu o le atunuu i Savaii, ua leai ni pasi.

O lea foi la ua faatulai mai le Tulafono Teuteu lenei ma le agaga maualuga ia siitia le tulaga o le faiga o palota. O le tatalo a lenei itumalo ma le fesili o lea e tuuina atu i le Afioga i le Minisita ma le Komesina ma le Ofisa, ua sauni le tatou Matagaluega e foia faafitauli e ono tulai mai i suiga ia ua aumai i le Palemene? Aua o lea sa maua i le aso ananafi i le tatou faatalatalanoaga o lenei Tulafono Tau Faaofi, o se taimi muamua lea o lea ua develop ai e le tatou lava ia Internal IT le system fou lenei, aua o le system o lo o i ai i le taimi nei, ia o lea sa faatino e le CSL.

Ae pei o lau maitau ananafi, e pei e tasi lea matatia i lau faalogo atu, o le fiafia ua mafai e le tatou Internal IT ona develop le system lenei mo le faiga palota. A ia manatua o le CSL o le isi entity lea a le Malo. Sa tataua ona mafai ona galulue faatasi le tatou Ofisa o le Faiga Palota ma le CSL e foia le faafitauli lea e tulai mai. Aua o le maitau ananafi, o le system atoa e develop e le tatou Matagaluega. Pau lava le vaega lea e outsource i fafo, o le kamupani e faia biometrics. O le puega o ata ma le faiga o le fingerprints. O le popolega lea i lenei itumalo, e le faapea ua tuumauualoina o tatou tagata, ae o le system e faatino ai le faiga palota, e le o se mea e laitiiti, e tele faafitauli. Sa ou faapea ai e vaavaai i se system ua uma ona test ma prove i isi atunuu, ia ona aumai lea e ui ina tele, ae mafai ona downsize e suitable mo le size o le tatou atunuu, a o se system ua uma ona test lelei ma run ai faafitauli ia. Peitai, o lea e maua atu o se taimi muamua lenei o lea ua fai ai e o tatou tagata. Ia e momoli atu le



faamalo ma le faafetai i le tulaga foi ua oo i ai le tomai ma agavaa o tatou tamafanau.

Ae o le popolega lava lea i lenei itumalo e pei ona tau faailoa atu, ua outou faafofoga i le tulaga ua i ai faiga palota i atunuu e mamao e pei o Amerika talu ai nei, hack e Rusia le system a Amerika, faasese atoa ai le faitauga o palota. O le fesili foi lea o lea e tulai mai, o le a se tatou mea e fai pe a tulai mai se tulaga faapena? Aua e mafai foi e lenei Vaega Faaupufai ona totogi se kamupani i fafo e hack ina mai le tatou system pe a matou naunau foi matou matou te fia malo. E mafai foi e le faigamalo o lo o tulai mai i le taimi nei ona fai se tulaga faapena.

E pei o tulaga ia e tatau ona silasila mamao i ai, ae pei ona avatu se manatu o lenei itumalo, e lagolagoina e le itumalo lenei ni suiga o le Tulafono ina ia mafai ona siitia le tulaga o faiga palota a le tatou atunuu, aemaise lava le faafitauli lea pei ona ou fai atu ai i le taimi ua sola. Ia matua tafiesea le palota fua o ni tagata e le o ni tagata o le itumalo o le sui usufono o le itumalo.

Na ou faalogologo i nisi o atugaluga o nisi o sui usufono i le aso ananafi, o le Tulafono lenei e vaai atu e uma ane o le toatele o tatou e le toe foi mai i le Palemene. E le faapena le manatu o le sui usufono lenei o Falelatai ma Samatau. E lagolagoina e le itumalo lenei se system lelei e faatino ai le amiotonu, le amiotonu i le faiga o tatou faiga palota. Afai ifo lava le system e le toe sau le sui usufono o Falelatai ma Samatau i le isi faiga palota ae fai le amiotonu, o le mea lenei ou te pipii i ai. Ioe. A o le mea lea faapea e fai le system ia aua ne i i ai se isi o tatou e le toe foi mai, e faamalulu atu e le auai lenei sui usufono. A o le agaga lenei o lenei itumalo o lea e tulituli atu, ia tatou o e fai se system ina ia maua ai le amiotonu. Ioe. Ia tafiesea nei mea o faiga eleelea ma faiga palapala, aua o le mea lava lea o lea tatou te alalaga ai nei, o le finagalo o le Atua pe a uma le faiga palota. A o le fesili, e sao nei lafoga tatou te fai? E pei ua tatou pasese i le Suafa o le Atua Mamalu, a o le matua palapala lava o tatou mea e fai. O le mea lea e lagolagoina ai e lenei itumalo se system pe afai o le system lea e maua ai le amiotonu ma siitia ai le tulaga o faiga palota i se tulaga lelei.

E le o po se lilo o lea faatoa maea atu le isi poloketi tele lava a le tatou Malo, o le tatou National Ids, a o lea foi ua tulai mai lenei Tulafono fou. O le a tatou toe o foi e toe tapue ata ma fai fingerprints a o le fautuaga e tuutuu atu i le Afioga i le Tamaitai Palemia ma le Malo, ua tatau ona vaai se tatou massive database ia maua uma ai faamaumauga ia o le atunuu. O le a lava le polokalame a le Malo e fuafua mai lea taimi i lea taimi, a o lea ua mausali le database e abstract mai ai le information, e aunoa ma le tatou toe o e fai le mea lea e tasi. Ia lea ua ou faalogo atu i nisi o sui usufono, ave le tai \$100 e vave ai ona fai, ae a mautu se database lelei a le tatou Malo e i ai, o le tele ia o mea e mafai ona faaoga i ai. E le gata i lenei Tulafono Tau Faaofi o Faiga Palota 2024, ae faapena foi i le soifua maloloina, o talosaga i nonogatupe i faletupe. Aua tasi lenei vaega o lo o tupu i le taimi nei. E le o maua lelei faamaumauga ina ia mafai ai ona fai faaiuga talafeagai mai lea taimi i lea taimi.

O le tulaga i le fesiligia po o le a se backup plan a le tatou Ofisa pe afai ae alu alu le faatinoga o lenei faamoemoe ae le tau e le uma ona faatino i le 18 masina o lumanai. O lea na saunoa le Komesina i le aso ananafi, o le backup plan, o le faatuatuaina o le latou Ofisa e mafai lava ona faatino e ala i le faalauiloa ma

nisi o follow up e pei ona tuuina mai. A o lea lava ou te mafaufau e pei ona maua i nisi o saunoaga, o le backup plan lava o le system tuai la e i ai. Afai e fai fai atu lava le tatou system fou ae uma le taimi e le i maea lelei, ia, e le o mafai ona delete ese le system tuai, e mafai lava ona faaaoga, e faaatoatoa ai ni mea e le o mafai ona atoatoa.

Ia ma le vaega lava lea e pei ona saunoa foi nisi o Minisita, o le mataupu i le resitala online, e le o se mea fou. O lea e i ai le Tulafono o le 2019, ae pau lava na o nai tuualalo ma faaeteetega e avatu pea i le tatou Malo, o le out of control o le resitalaina o tagata ma le taimi e fai ai le faiga palota. Aua po o le a lava le ituaiga system tatou te o e fai, o le faamaoni o le tagata faigaluega le mea aupito sili ona taua. Pe tatou te o e fai le system e tau i le lagi fai mai e secure, ae a le faamaoni le tagata e faaaogaina le system, e matua oti atoa mea uma. O le mea lea e le o faapea o avatu se faitioga i le afioga i le Komesina ma le Ofisa, a o le tuualalo a lenei itumalo, ia tautuana ma outou le faiga o lenei system fou, ia le gata ina tuu atoatoa i ai lo outou malosi, tomai ma agavaa ma le iloa, faapea foi le faamaoni e faatino ai.

Ia ma le isi itu taua, e pei foi ona molimauina i le tele o poloketi a le tatou Malo, na ona uma lava ona fai o le system tuu atu i tagata ae le lava se taimi e aoao ai tagata i le faaaogaina aua o le tele lava lena o failures ia e i ai i le tele o poloketi, e le lava le aoaoina o tagata e faaaogaina. O lea e maitauina i faiga palota uma, e toatele le aufaigaluega a le Malo mai lea Matagaluega ma lea Matagaluega e omai e faatino le tatou faiga palota, a o vaega uma ia e tataua ona tapena i ai le tatou Ofisa.

Ia, pei na pau ia o nai vaega lau Afioga i le Fofoga Fetalai, ae momoli atu le faafetai tele mo lo matou avanoa. Manuia le Fono.

**FOFOGA FETALAI:** Ua faamalo saunoa i lau Afioga i le sui usufono mamalu, faafetai foi mo lou sao o lea ua tuuina mai aua lava lenei Tulafono Tau Faaofi e pei on ai luga o le Laulau a Fono a le Palemene. Malo faafetai.

Ia ua maitau atu e le o toe mamao ae manava le tatou galuega. Ua ou manatu foi, a i ai foi se sui usufono e fia saunoa, e lelei foi le saili malosi mo le aso a taeao e amatalia ai le tatou Fono a taeao a ua lava tapena. O le mea lea o lea ua tatou taunuu mai ua latalata i le tatou taimi manava i lenei aso Fono, malo lava faafetai. E momoli atu lava le faafetai tele i sui usufono mamalu sa sausaunoa, ua tele foi itu aoga ua taoto atu i le Minisita ma le Malo e faufau ai le tatou Tulafono. Malo faafetai.

Faafetai foi i Ofisa Sili o Pulega o Matagaluega ma Faalapotopotoga Tumaoti a le tatou Malo le onosai mo auaunaga e lagolago ai tatou taualumaga. Faamanuia le Atua. Faafetai Samoa i lau tapuaiga. O le matou tatalo ia agalelei le Atua i toega o faiva ma tiute o lenei aso.

Ae tatou te le i tolopo ou te talosaga atu i le sui usufono mo Aleipata Itupa i Luga e saunia se tatou tatalo e faaiu ai le tatou Fono.

*Na tolopo Tausalumaga a le Fono Aoao Faitulafono i le itula e 1:01 i le aoauli seia aulia le Aso Lulu, 06 Mati 2024 i le itula e 9:30 i le taeao.*